

KEV TSIV

Kev Tsiv, Zaj 1 thiab 2

Cov Hes Nplaws raug luag hiam.
1 : 8 - 14 + 22.

1 8 Muaj ib tug vaj tshiab sawv los
kav Hais Nkws Tos teb. Nws tsis
paub txog Yos Xes. 9 Nws hais rau nws
cov neeg tias:

"Cov neeg His Xas Lais coob tshaj peb
thiab muaj zog tshaj peb lawm. 10 Peb
yuav tsum nrhiav ib zag tswv yim yuam
kom lawv tsis txhob huam vam ntxiv.
Yog tsis ua li ntawd mas ntshai tsam
thaum muaj tsov rog, ces lawv mus nrog
cov yeeb ncuab koom siab. Mas peb cov
yeeb ncuab yuav coob heev, tsam lawv tig
rov ntaus rog rau peb kom tau tawm hauv
lub teb chaws no mus."

11 Ces lawv tsa ib cov thawj saib hauj
lwm yuam cov His Xas Lais kom ua hauj
lwm hnyav hnyav raws li lawv txib, kom
cov His Xas Lais lub neej txom nyem.
Cov His Xas Lais thiaj ua hauj lwm
hnyav txhim tsa tau ob lub nroog muaj tej
txhab ntim qoob rau Fas Las Oos, yog ob
lub nroog Pis Toos thiab Las Mas Xes.
12 Tab sis lawv yim ua kom cov His Xas
Lais txom nyem, cov His Xas Lais yim
huam coob ntxiv, lawv nyob thoob qhov
txhia chaw. Ces neeg ntshai cov His Xas
Lais.

13 Cov Hais Nkws Tos yuam kom cov
His Xas Lais ua hauj lwm tas mus li,
14 mas lawv lub neej txom nyem kawg,
vim lawv ua hauj lwm hnyav : lawv do
av, npaj av, puab thwv cib, thiab lawv ua
ntau yam hauj lwm hnyav nyob nruab liaj
nruab teb. Luag yuam lawv ua txhua
tsav txhua yam hauj lwm.

22 Fas Las Oos ceeb toom li no rau nws
cov neeg tias :

"Cov His Xas Lais yug tau pes tsawg leej

tub, mas nej muab pov rau hauv tus Niam
Dej, hos cov ntxhais mas, nej cia nyob."

Mais Xes yug los. 2 : 1 - 10.

2 1 Muaj ib tug txiv neej yog Les
Vis xeeb ntxwv mus yuav ib tug
ntxhais kuj yog Les Vis xeeb ntxwv thiab,
los ua txij nkawm. 2 Tus poj niam yug
tau ib tug tub. Nws pom tias nws tus tub
zoo nraug kawg, nws muab tus tub zais
tau peb hlis. 3 Thaum nws zais tsis tau
ntxiv lawm, nws npaj ib lub tawb xub yib,
nws muab roj hmab dub thiab muab roj
ntoo thuv leem zoo zoo rau. Nws tso tus
me nyuam rau hauv lub tawb, nws coj
mus tso rau hauv ib koog tauj deg ntawm
ntug Niam Dej. 4 Tus me nyuam tus
muam hlob nyob tsis deb ntawd, saib
yuav muaj dab tsi tshwm sim rau tus me
nyuam. 5 Thaum ntawd Fas Las Oos
tus ntxhais nqes tuaj da dej hauv tus Niam
Dej, nws cov ntxhais txib ncig ua si
ntawm ntug dej. Tus ntxhais pom lub
tawb ntab ntab hauv cov tauj deg, nws
kom ib tug ntxhais txib mus muab los.
6 Nws muab qhib xyuas ces nws pom tus
me nyuam : yog ib tug tub quaj quaj
nyob hauv. Nws hlub tus me nyuam, nws
hais tias :

"Yog ib tug me nyuam tub Hes Nplaws."
7 Tus me nyuam tus muam tawm los hais
rau Fas Las Oos tus ntxhais tias : "Koj
puas xav kom kuv mus nrhiav ib tug poj
niam Hes Nplaws tuaj pab koj pub mis
rau tus me nyuam noj ?"

8 Fas Las Oos tus ntxhais teb tias :
"Koj mus nrhiav tuaj."
Tus me ntxhais thiaj mus nrhiav tus me
nyuam leej niam tuaj. 9 Fas Las Oos tus
ntxhais hais tias :

"Koj coj tus me nyuam no mus tu rau kuv, kuv yuav muab nqi zog rau koj." Ces tus poj niam coj tus me nyuam mus tu lawm. 10 Thaum tus me nyuam loj lawm, nws coj tus me nyuam rov tuaj rau Fas Las Oos tus ntxhais. Fas Las Oos tus ntxhais hhub tus me nyuam ib yam li yog nws tus tub. Nws tis npe hu ua Mais Xes, nws hais tias :
"Vim kuv tau npo nws hauv dej los."

Mais Xes khiav mus Mas Dias teb.
2 : 11 - 22.

11 Thaum Mais Xes hlob lawm, muaj ib zaug, nws mus xyuas nws cov kwv tij. Nws pom tej hauj lwm uas luag yuam lawv ua. Nws kuj pom ib tug Hais Nkws Tos tab tom muab nws ib tug kwv tij Hes Nplaws ntaus. 12 Nws ntsia ib ncig tsis pom muaj leej twg, nws txawm muab tus Hais Nkws Tos tua, thiab muab zais rau hauv cov suab puam. 13 Hnub tom qab, nws rov tuaj, pom ob tug neeg Hes Nplaws tab tom sib ntaus. Nws hais rau tus xub thab tias :

"Tim li cas koj ntaus koj tus npawg ?"

14 Tus ntawd teb tias :

"Leej twg tsa koj ua txwj laus txiav txim rau wb ? Koj puas xav muab kuv tua xws li koj tua tus Hais Nkws Tos thiab ?"

Mais Xes ntshai, nws xav tau tias : "Ntshai sawv daws paub tas lawm."

15 Ces Fas Las Oos hnov hais txog qhov ntawd, nws nrhiav Mais Xes tua. Mais Xes thiaj khiav mus deb ntawm Fas Las Oos. Nws khiav mus txog Mas Dias teb. Nws mus zaum ntawm ib lub qhov dej.

16 Ib tug leej choj Mas Dias muaj xya leej ntxhais, cov ntxhais tab tom tuaj ce dej rau lawv txiv cov tsiaj haus. 17 Muaj ib pab neeg Yug yaj nyob ntawd caum cov ntxhais kom khiav mus. Mais Xes

sawv tsees mus tiv thaiv lawv. Nws ce dej rau lawv cov tsiaj haus. 18 Thaum lawv rov qab los txog tsev, lawv txiv nug lawv tias :

"Ua cas hnub no nej yuav los tsev ntxov ua luaj ?"

19 Cov ntxhais teb hais tias :

"Yog ib tug neeg Hais Nkws Tos pab peb, nws tiv thaiv peb ntawm ib pab neeg Yug yaj, nws tseem pab ce dej rau peb cov tsiaj haus thiab".

Lawv txiv nug ntxiv tias :

20 "Nws nyob qhov twg ? Ua cas nej tso nws pov tseg ? Nej kav tsij mus coj nws los nrog peb noj mov."

21 Mais Xes thiaj li txiav siab nrog tus leej choj ntawd nyob. Tus leej choj muab nws tus ntxhais hu ua Xis Pos Las rau Mais Xes yuav ua poj niam. 22 Xis Pos Las yug tau ib tug tub. Mais Xes tis nws npe hu ua Nkes Sos. Mais Xes hais tias vim "kuv yog ib tug neeg khiav tuaj nyob pej kum teb."

Tswv Ntuj hu Mais Xes hauv tsob pos cig cig. 3 : 1 - 6.

3 1 Mais Xes niaj hnub mus zov nws yawm txiv Zes Raus pab yaj.

Zes Raus yog ib tug leej choj Mas Dias. Mais Xes coj nws yawm txiv cov yaj mus noj zaub dhau teb chaws suab puam, ces nws mus txog Tswv Ntuj lub roob Hos Les. 2 HUAB TAIS tus Tshiab yees tawm los rau Mais Xes pom nyob hauv ib co nplaim taws cig cig nyob hauv ib tsob pos. Mais Xes ntsia ntsoov, tsob pos cig cig ntsa iab tab sis tsis txawj kug li.

3 Ces Mais Xes hais tias :

"Kuv yuav lug kev mus xyuas yam txawv txawv ntawd saib yog dab tsi, ua cas tsob pos ntawd cig cig tsis txawj kug."

4 HUAB TAIS pom nws lug kev tuaj

xyuas, ces Tswv Ntuj hu nws hauv tsob
ntoo tuaj tias :

"Mais Xes, Mais Xes."

Mais Xes teb tias :

"Kuv nyob ntawm no."

5 Tswv Ntuj hais tias :

"Koj txlob txav los ze ntawm no, hle koj
nkawm khau ntawm koj ko taw, vim thaj
chaw uas koj tsuj no yog ib thaj chaw
ntshiab."

6 Tswv Ntuj hais ntxiv tias :

"Kuv yog koj cov yawg koob tus Tswv
Ntuj, yog Has Nplas Has tus Tswv Ntuj,
yog His Xas Has tus Tswv Ntuj, thiab yog
Yas Kos tus Tswv Ntuj."

Ces Mais Xes thaiv nws lub ntsej muag,
vim nws ntshai tsam nws qhov muag tau
pom Tswv Ntuj.

Tswv Ntuj xa Mais Xes mus.

3 : 7 - 12.

7 HUAB TAIS hais tias :

"Kuv pom, kuv pom kuv haiv neeg txoj
kev txom nyem nyob Hais Nkws Tos teb.
Kuv hnov lawv lub suab quaj vim luag
quab yuam lawv. Kuv paub lawv tej kev
txhawj xeeb tas huv si. 8 Kuv nqes los
cawm lawv kom dim ntawm cov Hais
Nkws Tos txhais tes. Kuv yuav coj lawv
tawm hauv lub teb chaws ntawd rov los
rau ib lub teb chaws dav thiab zoo qoob,
lub teb chaws muaj mis nyuj thiab zib mu
ntws sis laub sis lug, yog lub teb chaws
uas cov Kas Nas Has, cov His Tis, cov As
Mos, cov Pes Lis Xis, cov His Vis, thiab
cov Zes Npws nyob. 9 Nyem no, cov
His Xas Lais lub suab quaj nrov tuaj txog
kuv. Kuv pom cov Hais Nkws Tos txoj
kev quab yuam lawv loj. 10 Nyem no,
koj mus, kuv xa koj mus cuag Fas Las
Oos. Koj mus ua kom kuv haiv His Xas
Lais tawm hauv Hais Nkws Tos teb los."

11 Mais Xes hais rau Tswv Ntuj tias :
"Kuv yog leej twg, kuv thiab yuav mus
cuag Fas Las Oos tau, thiab ua tau kom
cov His Xas Lais tawm hauv Hais Nkws
Tos teb los ?"

12 Tswv Ntuj hais tias :

"Kuv yuav nrog nraim koj, kuv muab lub
cim no rau koj, kom koj paub tseeb tias
yog kuv xa koj mus tiag : Thaum koj coj
haiw His Xas Lais tawm hauv Hais Nkws
Tos teb lawm, mas nej yuav teev Tswv
Ntuj saum lub roob no."

Tswv Ntuj qhia nws lub npe.

3 : 13 - 15.

13 Mais Xes hais rau Tswv Ntuj tias:
"Thaum kuv mus cuag cov His Xas Lais,
thiab kuv hais rau lawv tias : 'Nej cov
yawg koob tus Tswv Ntuj xa kuv tuaj pab
nej.' Yog lawv hais rau kuv tias :
'Nws lub npe hu li cas ?'

Kuv yuav hais li cas rau lawv ? 14 Tswv
Ntuj hais rau Mais Xes tias :

"Kuv yog tus kuv yuav yog."

Tswv Ntuj hais ntxiv tias :

"Koj yuav hais rau cov His Xas Lais li
no : 'Kuv yog tus kuv yuav yog' xa kuv
tuaj pab nej."

15 Tswv Ntuj tseem hais ntxiv rau Mais
Xes tias :

"Koj yuav hais li no rau cov His Xas
Lais :

'HUAB TAIS, uas yog nej cov yawg
koob tus Tswv Ntuj, yog Has Nplas Has
tus Tswv Ntuj, yog His Xas Has tus Tswv
Ntuj thiab yog Yas Kos tus Tswv Ntuj xa
kuv tuaj pab nej. Lub npe no yog kuv lub
npe mus ib txhis, neeg yuav tuav lub npe
no hu txog kuv mus txheej dhau txheej.'

Tswv Ntuj qhia hauj lwm rau Mais Xes. 3 : 16 - 20.

16 Koj mus, koj hu cov txwj laus His Xas Lais tuaj sib sau, koj hais rau lawv tias: 'HUAB TAIS uas yog nej cov yawg koob tus Tswv Ntuj, yog Has Nplas Has tus Tswv Ntuj, His Xas Has tus Tswv Ntuj thiab Yas Kos tus Tswv Ntuj, tau yees tawm los rau kuv pom, nws hais rau kuv tias : Kuv tuaj xyuas nej, kuv pom txhua yam uas luag ua rau nej nyob Hais Nkws Tos teb. 17 Ces kuv hais tias kuv yuav coj nej tawm hauv txoj kev txom nyem nyob Hais Nkws Tos teb mus nyob hauv cov neeg Kas Nas Has daim av, thiab cov His Tis, cov As Mos, cov Pes Lis Xis, cov His Vis thiab cov Yes Npus Xis daim av, yog ib daig av uas muaj mis nyuj thiab zib mu ntws lug.' 18 Lawv yuav mloog koj cov lus. Koj yuav nrog cov txwj laus His Xas Lais, nej yuav mus cuag tus vaj Hais Nkws Tos, nej yuav hais rau nws tias : 'HUAB TAIS uas yog cov Hes Nplaws tus Tswv Ntuj tuaj xyuas peb lawm. Thov koj tso lus rau peb mus deb li peb hnub ke lawm hauv teb chaws suab puam, peb yuav mus txi peb tus HUAB TAIS Tswv Ntuj.' 19 Kuv paub zoo tias tus vaj Hais Nkws Tos yuav tsis tso nej mus yooj yim, yuav tsum muaj ib txhais tes muaj hwj huam yuam nws xwb, nws thiaj tso. 20 Vim li ntawd, kuv yuav tsa kuv txhais tes, thiab yuav ua ntawd yam hwj huam yees ntxwv nyob Hais Nkws Tos los tiv nws, ces thaum kawg, nws yuav tso nej mus.

Mais Xes txais lub pee v xwm ua hwj huam yees ntxwv. 4 : 1- 9.

4 1 Mais Xes rov qab hais tias :

"Tsam lawv tsis ntseeg kuv thiab tsis mloog kuv cov lus, lawv hais rau kuv tias : HUAB TAIS tsis tau yees tawm los rau koj pom ib zaug ?"

2 HUAB TAIS hais rau Mais Xes tias : "Koj tuav dab tsi ntawm koj tes ?" Mais Xes teb hais tias : "Ib rab pas."

3 HUAB TAIS hais rau nws tias : "Pov koj rab pas rau pem teb." Mais Xes muab rab pas pov rhees hauv pem teb, rab pas txia ua ib tug nab, ces Mais Xes thaub qab. 4 HUAB TAIS hais rau Mais Xes tias :

"Cev koj txhais tes mus tuav nab tus tw." Mais Xes cev tes mus tuav nkaus, ces rov qab yog rab pas nrig nyob hauv nws tes.

5 "Koj ua li no ces lawv yuav ntseeg tias HUAB TAIS uas yog lawv cov yawg koob tus Tswv Ntuj, yog Has Nplas Has tus Tswv Ntuj, His Xas Has tus Tswv Ntuj thiab Yas Kos tus Tswv Ntuj, tau yees tawm los rau koj pom tiag."

6 HUAB TAIS tseem hais rau Mais Xes tias :

"Muab koj txhais tes ntsaws rau hauv koj hauv siab."

Mais Xes ntsaws nws txhais tes rau hauv nws hauv siab. Thaum Mais Xes thau nws txhais tes tawm los, nws txhais tes twb mob ruas dawb paug cuag daus lawm. 7 HUAB TAIS hais tias :

"Rov ntsaws koj txhais tes rau hauv koj hauv siab."

Mais Xes rov ntsaws nws txhais tes rau hauv nws hauv siab, ces nws muab thau rov los, nws txhais tes rov qab zoo xws li nws lub cev nqaj lawm.

8 "Li ntawd, yog koj ua thawj yam hwj huam rau lawv pom tas, lawv tsis ntseeg koj, tseem tsis tau txaus lawv siab thiab, mas koj ua yam ob, ces lawv yuav ntseeg xwb. 9 Yog tias lawv tsis ntseeg koj li, txawm koj twb ua ob yam hwj huam no rau lawv pom tas, los lawv tsis mloog koj hais li, no ces koj mus ce ib qho dej hauv tus Niam Dej los, koj muab hliv rau hauv

av, ces cov dej uas koj tau ce hauv tus
Niam Dej los yuav hloov ua ntshav nyob
saum cov av qhuav."

**As Loos pab Mais Xes cev lus.
4 : 10 - 17.**

10 Mais Xes hais rau HUAB TAIS tias :

"Huab Tais, thov koj zam txim, kuv ib txwm tsis yog ib tug neeg txawj hais lus, yav tag los kuv yeej tsis txawj, tab yog zaum no, koj tau hais lus rau koj tus tub txib lawm, los kuv tseem tsis txawj, vim kuv lub ncauj qeeb thiab kuv tus npplaig txhav."

11 HUAB TAIS hais rau Mais Xes tias : "Yog leej twg muab ib lub qhov ncauj rau tib neeg ? Leej twg thiaj ua tau kom neeg npplaig txhav los lag ntseg, kom neeg pom kev los dig muag ? Tsuas yog kuv xwb, vim kuv yog HUAB TAIS. 12 Koj cia li mus tam sis no, kuv yuav nyob ntawm koj qhov ncauj, kuv mam qhia cov lus uas koj yuav tsum hais."

13 Mais Xes tseem hais ntxiv tias : "Huab Tais, thov zam txim, thov koj xa lwm tus mus."

14 Ces HUAB TAIS npau taws rau Mais Xes, HUAB TAIS hais tias :

"Twb muaj koj tus kwv As Loos uas yog ib tug Les Vis. Kuv paub tias nws txawj hais lus kawg. Nws tab tom tuaj cuag koj nyob ntawm no, nws pom koj mas nws yuav zoo siab. 15 Koj yuav nrog nws tham, thiab koj yuav qhia nws kom nws tshaj cov lus no. Kuv yuav nyob ntawm koj qhov ncauj thiab nyob ntawm nws qhov ncauj, thiab kuv yuav qhia neb paub tias neb yuav tsum ua dab tsi. 16 Nws yog tus yuav pab koj hais lus rau tsoom pej xeem, nws yog koj lub qhov ncauj, koj yog tus tshoj nws kom hais. 17 Rab

pas no, koj yuav tuav rawv ntawm tes, vim koj yuav siv los ua hwj huam yees ntxwv."

Mais Xes mus cuag Fas Las Oos thawj zaug. 5 : 1 - 5.

5 1 Dhau qhov ntawd lawm, Mais Xes thiab As Loos nkawd mus cuag Fas Las Oos, nkawd hais tias : "HUAB TAIS uas yog cov His Xas Lais tus Tswv Ntuj hais li no : Koj tso kuv haiv neeg mus, kom lawv tau mus nqaum paj nqaum nruas cav txog kuv nyob hauv teb chaws suab puam."

2 Fas Las Oos teb tias : "HUAB TAIS yog leej twg, kuv thiaj yuav tsum mloog nws lus thiab tso cov His Xas Lais mus ? Kuv tsis paub HUAB TAIS, hos ntawm cov His Xas Lais, mas kuv yuav tsis tso lawv mus kiag li !"

3 Nkawd hais tias : "Cov Hes Nplaws tus Tswv Ntuj tau tuaj xyuas peb. Thov koj cia peb mus nyob hauv teb chaws suab puam, deb li peb hnub ke, peb yuav mus txi peb tus HUAB TAIS Tswv Ntuj. Yog peb tsis ua li ntawd, mas nws yuav tso mob hnyav tuaj rau peb thiab tso ntaj los tua peb."

4 Tus vaj Hais Nkws Tos hais rau nkawd tias :

"Mais Xes thiab As Loos, vim li cas neb xav ua kom tsoom pej xeem khiav, tso lawv txoj hauj lwm pov tseg ? Neb cia li rov mus ua neb txoj hauj lwm thiab !"

5 Fas Las Oos hais tias : "Zaum no tsoom pej xeem coob tuaj nyob hauv lub teb chaws lawm, neb xav kom lawv tso lawv tej hauj lwm ntawd pov tseg lod ?"

Cov Hes Nplaws haj yam ua hauj lwm hnyav ntxiv. 5 : 6 - 9.

6 Hnub ntawd kiag, Fas Las Oos ceeb toom rau cov thawj saib hauj lwm, rau cov pej xeem thiab rau cov thoob xwm ntawv tias :

7 "Nej tsis txhob muab quav nyab rau tsoom pej xeem ua thwv cib ntxiv raws li nej tau ua los lawm, nej cia lawv nyias yuav tsum mus nrhiav nyias kom txaus nyias siv. 8 Txawm li ntawd los nej yuav tseev kom lawv ua tau thwv cib ntau ib yam li qub, tsis pub ua tsawg dua. Lawv yog ib co neeg tub nkeeg xwb, lawv thiaj qw qw tias : 'Peb yuav mus txi peb tus Tswv Ntuj.' 9 Yeej meem tsub hauj lwm ntau ntxiv rau cov neeg ntawd ua, kom lawv txhob muaj caij so, lawv thiaj yuav tsis nco mloog tej lus haub lus ntxias ntawd."

**Cov Hes Nplaws tsis zoo siab rau
Mais Xes. 5 : 19 - 23 + 6 : 1.**

19 Thaum luag hais rau lawv tias :

"Tsis pub kom nej ua tau thwv cib tsawg tshaj qhov qub."

Mas cov thoob xwm ntawv His Xas Lais pom tias lawv raug kev nyuaj loj kawg.

20 Thaum lawv tab tom tawm hauv Fas Las Oos tsev los, lawv ntsib Mais Xes thiab As Loos nkawd tuaj tos lawv kev.

21 Lawv cem nkawd tias :

"Thov kom HUAB TAIS txiav txim rau neb ! Neb tuaj ua kom Fas Las Oos thiab nws cov tub ncig ntxub peb, neb tuaj muab ntaj rau lawv tes kom lawv muab peb tua."

22 Mais Xes rov mus hais rau HUAB TAIS hais tias :

"Huab Tais, ua cas koj ua kom haiv neeg ntawd raug txom nyem ua luaj ? Ua cas koj thiaj xa kuv tuaj ? 23 Txij thaum kuv tuaj txog, kuv mus cuag Fas Las Oos thiab kuv tuav txog koj lub npe hais lus

rau nws tas, mas nws haj yam ua phem rau lawv, koj tsis ua dab tsi npo koj haiv neeg kom dim."

6 1 Ces HUAB TAIS hais rau Mais Xes tias :

"Zaum no, koj yuav pom kuv ua dab tsi rau Fas Las Oos. Ib txhais tes muaj zog yuav yuam kom nws tso lawv mus, ib txhais tes muaj zog yuav yuam kom nws ntiab lawv tawm hauv nws lub teb chaws mus."

Mais Xes rab pas nrig txia ua nab.

7 : 8 - 13.

7 8 HUAB TAIS hais rau Mais Xes thiab As Loos tias :

9 "Yog Fas Las Oos kom neb ua ib yam hwj huam yees ntxwv, mas koj yuav hais rau As Loos tias : Tuav koj rab pas, muab pov rau ntawm Fas Las Oos xub ntiag kom nws txia ua ib tug nab."

10 Mais Xes thiab As Loos mus cuag Fas Las Oos, nkawd ua raws li HUAB TAIS kom ua. As Loos muab nws rab pas pov rau ntawm Fas Las Oos thiab nws cov tub ncig xub ntiag, ces rab pas txia ua ib tug nab.

11 Fas Las Oos hu cov neeg txawj ntse thiab cov txiv khawv koob tuaj, ces cov txiv khawv koob Hais Nkws Tos siv lawv cov khawv koob, lawv kuj ua tau ib yam li ntawd thiab. 12 Lawv pov lawv cov pas kuj txia ua nab tas tib si, tiam sis As Loos rab pas nqos lawv cov pas tas huv si. 13 Txawm li ntawd los Fas Las Oos lub siab txhav qhi li qhov qub, nws tsis mloog lawv hais li, raws nraim li HUAB TAIS tau hais tseg.

Tus dej Nis txia ua ntshav.

7 : 14 - 24.

14 Ces HUAB TAIS hais rau Mais Xes tias :

"Fas Las Oos lub siab txhav qhi li qub, nws tsis kam tso kuv haiv neeg mus. 15 Tag kis sawv ntxov, koj mus cuag Fas Las Oos thaum nws mus tom ntug dej. Koj nyob ntawm ntug niam dej tos nws tuaj. Koj yuav tuav rawv rab pas uas tau txia ua nab ntawm tes. 16 Koj yuav hais rau nws tias :

"Cov Hes Nplaws tus HUAB TAIS Tswv Ntuj xa kuv tuaj hais rau koj : kom koj tso kuv haiv neeg mus, kom lawv mus tsob hwb kuv nyob hauv teb chaws suab puam. Los txog lub zwj ceeb no, koj tsis kam mloog. 17 Mas HUAB TAIS hais li no : Yam no yuav ua rau koj paub tias kuv yog HUAB TAIS tiag. Kuv yuav siv rab pas uas kuv tuav ntawm tes, kuv yuav nplawm cov dej hauv tus niam dej, ces cov dej yuav hloov ua ntshav. 18 Cov ntses nyob hauv dej yuav tuag tas, tus dej yuav tsw lwj ntxiag, cov Hais Nkws Tos yuav haus tsis tau cov dej hauv tus niam dej li."

19 HUAB TAIS hais rau Mais Xes tias : "Koj hais rau As Loos tias :

Tuav koj rab pas, koj tsa tes rau saum cov dej nyob Hais Nkws Tos teb, saum cov dej txhawv, cov kwj deg, cov hav iav thiab cov pas dej teev tib si, kom dej hloov ua ntshav, ces tas teb chaws Hais Nkws Tos yuav puv ntshav, tej ntoo tej pob zeb los yuav puv ntshav."

20 Mais Xes thiab As Loos ua raws li HUAB TAIS kom ua. As Loos tsa nws rab pas, nws ntaus cov dej hauv tus niam dej rau Fas Las Oos thiab nws cov tub ncig ntsia, ces cov dej hloov ua ntshav tas huv tib si. 21 Cov ntses nyob hauv tus dej tuag tas, tus dej tsw lwj ntxiag, cov Hais Nkws Tos haus tsis tau tus dej ntxiv, muaj ntshav nyob thoob teb chaws Hais

Nkws Tos. 22 Cov txiv khawv koob Hais Nkws Tos kuj siv lawv cov khawv koob ua tau ib yam li ntawd thiab. Fas Las Oos lub siab tawv qhawv, tsis kam mloog nkawd hais, raws li HUAB TAIS tau hais tseg lawm. 23 Fas Las Oos rov mus tsev, nws tsis quav ntsej txog tej ntawd li. 24 Cov Hais Nkws Tos mus khawb qhov taug tus ntug dej kom tau dej ntshab haus, vim lawv haus tsis tau cov dej hauv tus dej lawm.

Qav tawm los.

7 : 26 - 29 ; 8 : 1 - 4 + 8 - 11.

26 HUAB TAIS hais rau Mais Xes tias :

"Koj mus cuag Fas Las Oos, koj hais rau nws tias: HUAB TAIS hais li no : 'Koj tso kuv haiv neeg mus, kom lawv tau kev tsob hwb kuv.' 27 Yog koj tsis kam tso lawv mus mas kuv yuav tso qav los txom fav puv nkaus koj lub teb chaws. 28 Tus niam dej yuav muaj qav puv meem mias, qav yuav nce tawm los, yuav nkag los puv koj tsev, yuav muaj qav nyob hauv koj chav pw, nyob saum koj txaj, nyob hauv koj cov tub txib tej tsev, nyob hauv koj tsoom pej xeem tej tsev, nyob hauv koj tej qhov txos thiab tej tais do hmoov nplej tib si. 29 Qav tseem yuav nce rau saum koj, rau saum koj cov pej xeem thiab koj cov tub txib huv si."

8 1 HUAB TAIS hais rau Mais Xes tias :

"Koj hais rau As Loos tias : Tsa koj txhais tes uas tuav rawv rab pas rau saum cov niam dej, cov kwj deg thiab cov hav iav, kom qav nce tawm los nyob puv Hais Nkws Tos teb."

2 As Loos tsa nws txhais tes rau saum cov dej Hais Nkws Tos, ces cov qav nce tuaj nyob puv nkaus Hais Nkws Tos teb.

3 Tiam sis cov txiv khawv koob siv lawv cov txuj ci los ua tau ib yam li ntawd, lawv kuj ua tau kom qav nce tawm los nyob saum av Hais Nkws Tos. 4 Fas Las Oos hu Mais Xes thiab As Loos nkawd tuaj, nws hais tias :

"Neb thov kom HUAB TAIS ntiab cov qav ntawm kuv thiab ntawm kuv haiv neeg mus kom tas. Kuv cog lus tias kuv yuav tso nej haiv neeg mus kom lawv tau mus txi HUAB TAIS."

8 Thaum Mais Xes thiab As Loos nkawd tawm hauv Fas Las Oos tsev mus, Mais Xes thov kom HUAB TAIS sau cov qav uas nws tau tso los txob Fas Las Oos rov qab. 9 Ces HUAB TAIS ua raws li Mais Xes thov : qav tuag pawg lug hauv tej tsev, tej tshav puam thiab tej liaj teb. 10 Lawv muab sau ua tej pawg nco lug, mas lub teb chaws tsw lwj ntxiag. 11 Fas Las Oos pom tias sawv daws rov tau nyob zoo lawm, nws rov ua siab tawv qhawv dua, nws rov tsis mloog nkawd hais, raws nraim li HUAB TAIS tau hais tseg.

Yoov tshaj cum tom neeg.

8 : 12 - 15.

12 HUAB TAIS hais rau Mais Xes tias : "Koj hais rau As Loos tias : Tsa koj rab pas thiab ntaus cov plua tshauv hauv av. Ces cov plua tshauv ntawd yuav txia ua yoov tshaj cum nyob thoob Hais Nkws Tos teb."

13 As Loos tsa nws txhais tes uas tuav rawv rab pas, nws ntaus cov plua tshauv hauv av, ces cia li muaj yoov tshaj cum tom tej neeg thiab tej tsiaj txhu, vim cov plua tshauv hauv av txia ua yoov tshaj cum tas nyob thoob plaws Hais Nkws Tos teb. 14 Cov kws khawv koob Hais Nkws Tos siv lawv cov khawv koob los ua ib

yam li ntawd kom muaj yoov tshaj cum tawm los, tiam sis lawv ua tsis tau. Yoov tshaj cum tom tej neeg thiab tej tsiaj tsis tseg. 15 Cov txiv khawv koob hais rau Fas Las Oos tias :

"Yog Tswv Ntuj txhais tes ua tiag." Tiam sis Fas Las Oos ua siab tawv qhawv, tsis kam mloog lawv hais, raws nraim li HUAB TAIS tau hais.

Nkawj ya tuaj plev neeg.

8 : 16 - 28.

16 HUAB TAIS hais rau Mais Xes tias : "Tag kis koj sawv ntxov, koj mus tos Fas Las Oos kev thaum nws tuaj mus tom ntug dej. Koj hais rau nws tias : HUAB TAIS hais li no : Koj tso kuv haiv neeg mus kom lawv tau tsob hwb kuv.

17 Yog koj tsis tso kuv haiv neeg mus mas kuv yuav tso ib co nkawj tuaj plev koj, plev koj cov tub txib, koj haiv neeg, thiab tuaj rau hauv koj tej vaj tej tsev huv si. Cov neeg Hais Nkws Tos tej vaj tej tsev yuav muaj nkawj puv nkaus, cov av lawv tsuj los yuav muaj huv tib si. 18 Tab sis kuv yuav txuag lub xeev Nkaus Sees uas kuv haiv neeg nyob, tsis pub ib tug nkawj ya mus txog ntawd, kom koj paub tias kuv yog HUAB TAIS tiag, yog kuv ua rau lub teb chaws. 19 Kuv yuav ua cais npho koj haiv neeg ntawm kuv haiv neeg. Lub cim no yuav tshwm sim tuaj tag kis."

20 HUAB TAIS ua raws li ntawd, ces muaj ib co nkawj coob coob ya los hauv Fas Las Oos tsev, hauv nws cov tub txib tej tsev thiab hauv tas nrho cov Hais Nkws Tos tej tsev. Cov nkawj tuaj ua lub teb chaws piam tas. 21 Fas Las Oos hu Mais Xes thiab As Loos nkawd tuaj, nws hais rau nkawd tias:

"Nej txi nej tus HUAB TAIS nyob hauv

lub teb chaws no kuj tau."

22 Mais Xes teb tias:

"Tsis phim kom peb ua li ntawd, vim thaum peb tua tsiaj txi peb tus HUAB TAIS Tswv Ntuj, mas cov neeg Hais Nkws Tos saib yog ib qho phem kawg nkaus. Yog peb txi Ntuj rau lawv pom, peb tua tsiaj tua txhuv ua rau lawv ntxub, ces lawv kawg yuav txawb pob zeb tua peb xwb. 23 Peb yuav tsum mus deb li peb hnub ke hauv teb chaws suab puam, peb mam txi peb tus HUAB TAIS Tswv Ntuj, raws li nws tau kom peb mus."

24 Fas Las Oos hais tias :

"Kuv yeej yuav tso nej mus txi nej tus Tswv Ntuj hauv teb chaws suab puam, tiam sis tsis pub nej mus deb. Neb thov Ntuj rau kuv thiab."

25 Mais Xes hais tias :

"Txij thaum kuv tawm plaws hauv koj mus, mas kuv yuav thov HUAB TAIS rau koj, ces tag kis cov nkawj yuav khaiv ntawm Fas Las Oos cov tsev mus, ntawm nws cov tub txib thiab ntawm nws haiv neeg sawv daws mus tas huv tib si. Tiam sis Fas Las Oos yuav tsis txhob dag tias nws tso lus rau tsoom pej xeem tawm mus txi HUAB TAIS."

26 Mais Xes tawm hauv Fas Las Oos tsev mus, nws thov HUAB TAIS.

27 HUAB TAIS ua raws li Mais Xes thov, ces cov nkawj ya tawm hauv Fas Las Oos thiab nws cov tub txib thiab nws haiv neeg mus tas tib si, tsis tshuav ib tug nyob li. 28 Tiam sis Fas Las Oos kuj tseem rov ua siab tawv qhawv dua, nws tsis kam tso tsoom pej xeem mus li.

Tsiaj txhu tuag aws. 9 : 1 - 7.

9 1 HUAB TAIS hais rau Mais Xes tias:

"Koj mus cuag Fas Las Oos, koj hais rau

nws tias : Cov Hes Nplaws tus HUAB TAIS Tswv Ntuj hais li no : "Koj tso kuv haiv neeg mus, kom lawv tau tsob hwb kuv. 2 Yog koj tsis kam tso lawv mus, koj muab lawv khuam cia ntev ntxiv, 3 mas HUAB TAIS yuav tsa tes ntaus koj cov tsiaj txhu nyob hauv tej liaj teb, cov nees, cov luj, cov ntxhuav, cov nyuj thiab cov yaj cov tshis huv si kom tuag aws tas. 4 HUAB TAIS yuav cais cov His Xas Lais tej tsiaj txhu ntawm cov Hais Nkws Tos tej tsiaj txhu, cov His Xas Lais yuav tsis muaj ib tug tsiaj tuag li. 5 HUAB TAIS teem caij li no : Tag kis HUAB TAIS yuav ua qhov ntawd nyob hauv lub teb chaws."

6 Tag kis, HUAB TAIS txawm ua li ntawd, cov Hais Nkws Tos cov tsiaj txhu tuag nplawg ntia, hos cov His Xas Lais cov tsiaj txhu tsis tuag ib tug li. 7 Fas Las Oos tso neeg mus tshuaj xyuas cov His Xas Lais, lawv pom tias cov His Xas Lais cov tsiaj tsis tuag ib tug li. Tiam sis Fas Las Oos lub siab tseem tawv qhawv, tsis kam tso tsoom pej xeem mus.

Mob rwj.

9 : 8 - 12.

8 HUAB TAIS hais rau Mais Xes thiab As Loos tias:

"Neb tsuab ib leeg ib phoov tes nkhawb puv puv hauv qhov txos nqa mus, kom Mais Xes muab cov nkhawb ntawd pov saum ntuj rau Fas Las Oos ntsia. 9 Cov nkhawb yuav hloov ua hmoov mos mos ya mus puv lub teb chaws Hais Nkws Tos, yuav ua kom neeg thiab tej tsiaj mob rwj, ua paug ua kua yig thoob plaws Hais Nkws Tos teb."

10 Mais Xes nkawd nqa nkhawb hauv qhov txos, ces nkawd mus sawv ntawm Fas Las Oos xub ntiag. Mais Xes muab

w rau saum ntuj, ces tej tib neeg thiab tej tsiaj cia li mob kiav txhab, mob rwj ua paug ua kua yig thoob ib ce.

11 Cov txiv khawv koob tuaj tsis taus nrog Mais Xes sib tw, vim lawv kuj mob kiav txhab thoob ib ce ib yam li cov Hais Nkws Tos thiab. 12 Tab sis HUAB TAIS ua kom Fas Las Oos lub siab tawv qhawv, nws tsis kam mloog nkawd hais, raws nraim li HUAB TAIS tau hais rau Mais Xes.

Los lawg loj.

9 : 13 - 18 + 22 - 28 + 33 - 35.

13 HUAB TAIS hais rau Mais Xes tias : "Koj sawv ntxov, koj mus ntsib Fas Las Oos, koj hais rau nws tias: Cov Hes Nplaws tus HUAB TAIS Tswv Ntuj hais li no : Koj cia li tso kuv haiv neeg mus kom lawv tau kev tsob hwb kuv.

14 Zaum no, kuv yuav tso kuv cov xww txheej tuaj raug koj, raug koj cov tub txib thiab koj haiv neeg, kom koj paub tias tsis muaj ib tug zoo li kuv nyob ntiaj teb no.

15 Yog kuv tsa kuv txhais tes, yog kuv tso mob aws tuaj raug koj thiab koj haiv neeg, ces koj twb ploj hauv lub ntiaj teb no lawm. 16 Tiam sis kuv tseg koj nyob, kom koj pom kuv lub zog thiab kom kuv lub npe nrov thoob ntiaj teb. 17 Koj saib koj loj diam, koj tsis kam tso kuv haiv neeg mus. 18 Ua li mas tag kis, tav lub sij hawm no, kuv yuav ua kom los ib kob lawg loj loj, tsis tau pom dua lawg loj li ntawd nyob Hais Nkws Tos teb txij thaum lub teb chaws pib muaj los txog tav no."

22 HUAB TAIS hais rau Mais Xes tias : "Tsa koj txhais tes rau saum ntuj kom lawg poob los ntaus Hais Nkws Tos teb, ntaus cov neeg thiab cov tsiaj, ntaus tej nroj tsuag hauv tej teb nyob Hais Nkws

Tos teb."

23 Mais Xes tsa nws txhais tes rau saum ntuj, ces HUAB TAIS ua xob quaj nroo ntws thiab lawg poob nchuav lug los. Xob tua ntiaj teb nroo ntws, ces HUAB TAIS tso lawg los ntaus Hais Nkws Tos teb. 24 Lawg poob los thiab muaj hluav taws cig liab vog hauv cov lawg tuaj, yog ib kob lawg loj loj, tsis tau pom dua loj li ntawd nyob Hais Nkws Tos teb txij thaum pib muaj lub teb chaws los. 25 Los lawg thoob plaws Hais Nkws Tos teb, los ntaus tas puas tsav yam nyob hauv tej liaj teb lwj tas, puas tsuaj tas, tsis hais tib neeg los tsiaj txhu. Lawg los ntaus tej nroj tsuag hauv tej teb lwj tas, tej ntoo dam tas. 26 Tsuas yog lub xeev Nkaus Sees uas cov His Xas Lais nyob xwb thiab tsis los lawg. 27 Fas Las Oos hu Mais Xes thiab As Loos tuaj, nws hais rau nkawd tias :

"Zaum no, kuv ua txhaum lawm, HUAB TAIS yog tus ncaj ncees, kuv thiab kuv haiv neeg peb tau ua txhaum. 28 Neb thov HUAB TAIS. Xob quaj ntev lawm thiab los lawg txaus lawm. Kuv txiav siab tso nej mus, nej yuav tsis tau nyob ntawm no ntev ntxiv."

33 Thaum Mais Xes tawm hauv Fas Las Oos tsev thiab hauv lub nroog mus, nws tsa tes saum ntuj thov HUAB TAIS, ces xob ntsiag tsis nroo ntxiv thiab lawg tu tsis poob ntxiv, hos nag los kuj tu lawm. 34 Thaum Fas Las Oos pom tias nag tu lawm, lawg los tu, thiab xob tsis nroo ntxiv, nws rov qab ua txhaum dua, nws thiab nws cov tub txib rov ua siab tawv qhawv tuaj. 35 Fas Las Oos lub siab twm xeeb rov tawv tuaj, nws tsis kam tso cov tub ki His Xas Lais mus, raws nraim li HUAB TAIS tau xub hais rau Mais Xes.

Kooj txom fav.

10 : 3 - 6 + 12 - 20.

10 3 Mais Xes thiab As Loos nkawd mus cuag Fas Las Oos, nkawd hais rau Fas Las Oos tias :

"Cov Hes nplaws tus HUAB TAIS Tswv Ntuj hais li no : Koj yuav tawv txog thaum twg koj mam li yuav txa koj lub siab los ua neeg me nyob ntawm kuv xub ntiag ? Koj cia li tso kuv haiv neeg mus kom lawv tau tsob hwb kuv. 4 Yog koj tawv, tsis tso lawv mus, mas tag kis kuv yuav ua kom muaj kooj txom fav tuaj nyob hauv koj lub teb chaws. 5 Kooj yuav tsaws ntom nti puv av, yuav tsis pom av li. Lawv yuav noj tas puas tsav yam uas tseem tshuav, tas puas tsav yam uas lawg tsis tau ntaus, lawv yuav noj tas tej ntoo uas tuaj hauv nej tej liaj tej teb huv si. 6 Kooj yuav nkag los puv koj tej vaj tsev, puv koj cov tub txib tej tsev thiab puv tas cov Hais Nkws Tos tej tsev. Yog ib qho uas koj cov yawg koob thiab koj cov yawg suab tsis tau pom dua, txij thaum lawv nyob hauv lub teb chaws los txog tav no."

Ces Mais Xes tig rov qab, nws tawm hauv Fas Las Oos tsev mus. 12 HUAB TAIS hais tau Mais Xes tias :

"Tsa koj txhais tes rau saum lub teb chaws Hais Nkws Tos kom kooj tuaj puv Hais Nkws Tos teb, tuaj noj kom tas cov nroj tsuag hauv lub teb chaws uas lawg tseg cia."

13 Mais Xes tsa nws rab pas rau saum Hais Nkws Tos teb, ces HUAB TAIS ua kom ib nthwv cua tshuab sab toob fab tuaj hnub ntawd ib hnub, hmo ntawd ib hmos. Tag kis kaj ntug, nthwv cua toob fab tshuab tau ib co kooj tuaj. 14 Cov kooj dhia tuaj nyob thoob teb chaws Hais Nkws Tos, tuaj tsaws coob coob ntom nti

puv nkaus hauv tej av nyob Hais Nkws Tos. Tsis tau muaj dua kooj coob npaum li no ib zaug, yav tom ntej los yuav tsis muaj ib zaug li no ntxiv lawm. 15 Cov kooj tsaws puv ntom nkaus hauv av, lawv noj lub teb chaws qhov txhia chaw do tas. Lawv noj tas nrho cov nroj hauv lub teb chaws thiab cov txiv ntoo uas lawg tseg cia. Tsis tshuav ib qho ntsuab seem nyob saum tej ntoo los hauv tej nroj tsuag uas tuaj hauv tej liaj teb hauv lub teb chaws. 16 Fas Las Oos hu Mais Xes thiab As Loos nkawd kom tuaj sai sai. Nws hais tias :

"Kuv ua txhaum rau nej tus HUAB TAIS Tswv Ntuj thiab rau nej lawm. 17 Kuv thov koj zam txhaum rau kuv ib zaug ntxiv zaum no thiab, yuav yog zaum kawg, thiab koj thov nej tus Tswv Ntuj kom nws rhuav tshem qhov xwv txheej loj no ntawm kuv mus."

18 Mais Xes tawm hauv Fas Las Oos tsev mus, nws thov HUAB TAIS.

19 HUAB TAIS thiaj ua kom cua hloov seem, ces cua tshuab xib fab tuaj nplawm ntws hlob hlob pus tas cov kooj mus, coj mus tso rau hauv lub Hiav Txvv Tauj lawm. Tsis tshuav ib tug kooj seem nyob hauv Hais Nkws Tos teb ntxiv. 20 Tab sis HUAB TAIS ua kom Fas Las Oos lub siab tawv qhawv ntxiv, tsis kam tso cov His Xas Lais mus.

Teb chaws tsaus ntuj nti tau peb hnub. 10 : 21 - 29.

21 HAUB TAIS hais rau Mais Xes tias :

"Tsa koj txhais tes rau saum ntuj, kom tas lub teb chaws Hais Nkws Tos tsaus ntuj nti dub nciab cuag twb yuav kov tau."

22 Mais Xes tsa tes rau saum ntuj, ces Hais Nkws Tos teb tsaus ntuj nti dub nciab thoob plaws tau peb hnub. 23 Tej

neeg ib leeg tsis pom ib leeg li, tsis muaj neeg txav tau ntawm nws qhov chaw mus qhov twg li tau peb hnub nkaus. Tiam sis thaj tsam uas cov His Xas Lais nyob ho pom kev. 24 Fas Las Oos hu Mais Xes tuaj, nws hais tias :

"Nej mus tsob hwb HUAB TAIS, tab sis cia nej cov tsiaj loj thiab tsiaj me nyob. Nej coj nej cov poj niam me nyuam mus tib si los tau."

25 Mais Xes hais tias :

"Koj yuav tsum pub tej yam rau peb tau tua hlawa txi rau peb tus HUAB TAIS Tswv Ntuj. 26 Peb cov tsiaj txhu yuav tsum nrog peb mus tib si, tsis tseg ib tug nyob li, vim cov tsiaj ntawd yog cov peb yuav muab coj los txi rau peb tus HUAB TAIS Tswv Ntuj, tab sis peb tsis xub paub tias peb yuav tsob hwb HUAB TAIS zoo li cas, peb yuav tsum mus txog chaw tso.

27 Tiam sis HUAB TAIS ua kom Fas Las Oos lub siab taww qhawv, sis kam tso lawv mus. 28 Fas Las Oos hais rau Mais Xes tias :

"Koj tawm ntawm no mus ! Koj ceev faj rau koj ! Koj tsis txlob tuaj cuag kuv ntxiv, hnub twg koj tseem tuaj mas koj yuav tuag xwb."

29 Ces Mais Xes hais tias :

"Yog li koj hais, kuv yuav tsis tuaj cuag koj ib zaug ntxiv."

**Mais Xes qhia tias cov tub hlob
Hais Nkws Tos tuag. 11 : 4 - 8.**

11 4 Ces Mais Xes hais tias :
"HUAB TAIS hais li no : Thaum ib tag hmo, kuv yuav tuaj hla Hais Nkws Tos teb, 5 ces txhua tus uas yog tub hlob yuav tuag nyob Hais Nkws Tos, txawm yog Fas Las Oos tus tub hlob uas yuav zaum saum Fas Las Oos lub theej kiab,

los yuav tuag, txawm yog tus poj niam zom zeb xwb tus tub hlob los yuav tuag, txawm yog tej tsiaj txhu thawj tug me nyuam los yuav tuag huv si. 6 Nyob tas Hais Nkws Tos teb, sawv daws yuav quaj yuav nyiav zom zaws. Tsis tau muaj dua ib zaug li ntawd thiab yuav tsis muaj li ntawd ib zaug ntxiv lawm. 7 Tab sis nyob hauv cov His Xas Lais tsev, dev yuav tsis tom ib suab, dev yuav tsis tsem rau ib tug neeg los ib tug tsiaj li. Ces koj yuav paub tias HUAB TAIS cais cov His Xas Lais ntawm cov Hais Nkws Tos. 8 Hos koj cov tub txib uas nyob nplawg ntia ntawm no yuav tuaj cuag kuv, lawv yuav khoov hauv av pe kuv tias : 'Koj kav tsij khaiv mus, koj coj haiv neeg uas caum koj mus huv tib si !' Tej lus ntawd tu nrho, mas kuv yuav sawv kev mus tam sis ntawd."

Ces Mais Xes tawm hauv Fas Las Oos tsev mus, nws npau taws heev.

Hmo Hla. 12 : 1 - 14.

12 1 HUAB TAIS hais rau Mais Xes thiab As Loos nyob Hais Nkws Tos teb tias :

2 "Lub hlis no nej yuav muab suav ua thawj lub hlis, nej yuav muab ua thawj lub hlis qhib lub xyoo. 3 Neb hais rau ib tsoom pej xeem His Xas Lais tias: Lub hlis no xiab kaum, mas txhua yim neeg, nyias yuav tsum npaj nyias ib tug tsiaj me. 4 Yog yim neeg twg tsawg dhau noj tsis tas ib tug tsiaj me, mas nej yuav mus nrog lwm yim neeg uas nyob ze nej dua cov koom noj ib tug tsiaj. Nej yuav xaiv ib tug tsiaj kom txaus sawv daws noj tsis seem. 5 Nej yuav xaiv ib tug tsiaj zoo, tsis muaj chaw xyeej, yuav yog ib tug thav txiv yaj los thav txiv tshis, hnub ynoog ib xyoos. 6 Nej yuav ceev rau ib

qho tos txog hnub xiab kaum plaub, lub
hlis no.

Hmo tim kaum plaub, tas tsoom His Xas
Lais, nyias yuav tua nyias tus tsiaj thaum
tsaus ntuj zuag. 7 Nej yuav cug cov
ntshav coj mus pleev ob tug ncej puab
rooj thiab pleev daim txiag tav saum lub
qhov rooj nkag hauv lub tsev uas nej noj
tus tsiaj ntawd. 8 Hmo ntawd, nej yuav
noj nqaij txhiab hauv hluav taws, nej yuav
noj ntxuag ib co ncuv mov tsis xyaw
poov xab, thiab ib cov zaub iab. 9 Nej
tsis txhob noj ib yam nyos, los ib yam
hauv xyaw dej. Nej tsuas noj nqaij ci
hauv hluav taws, nrog lub taub hau, cov
tes taw thiab plab hnyuv huv si. 10 Nej
tsis txhob tseg ib qho seem rau tag kis.
Tag kis, yog seem dab tsi, mas nej muab
pov hlawv hauv hluav taws. 11 Thaum
noj mov nej yuav ua zoo li no : Nej sia
siv khov kho, nej rau khau, thiab tuav nej
rab pas nrig ntawm tes. Nej yuav sawv
ntsug noj, noj nrawm nroos, vim yog
HUAB TAIS hmo hla. 12 Hmo ntawd,
kuv yuav hla mus thoob Hais Nkws Tos
teb. Kuv yuav ntaus neeg cov tub hlob,
thiab tsiaj cov me nyuam hlob, kom ntog
tas huv tib si. Thiab kuv yuav muab txim
rau cov dab Hais Nkws Tos, vim kuv yog
HUAB TAIS. 13 Cov ntshav yuav yog
ib lub cim txuag nej hauv cov tsev uas nej
nyob. Kuv pom lub cim ntawd, kuv yuav
hla plaws mus, nej yuav tsis raug qhov
xwv txheej loj ntawd, vim kuv yog tus ua
rau Hais Nkws Tos teb.
14 Yav tom ntej, nej yuav cim ntsoov
hnub ntawd cia, nej yuav nqaum paj
nqaum nruas cav txog HUAB TAIS. Nej
yuav muab hnub ntawd los ua ib txog cai
nqaum paj nqaum nruas mus txheej dhau
txheej rau nej coj.

Kab ke ua Hmoov Hla.

12 : 21 - 28.

21 Mais Xes hu cov txwj laus His Xas
Lais tuaj, nws hais rau lawv sawv daws
tias : "Nej mus nrhiav ib tug tsiaj me rau nej
tsev neeg, nej yuav tua tus tsiaj hmo hla.
22 Nej muab ib re nplooj los tub cov
ntshav uas nej cug rau hauv phiab, ces nej
muab cov ntshav ntawd pleev daim txiag
tav saum lub qhov rooj thiab pleev ob tug
ncej puab rooj. Nej yuav caiv ib hmos
kaj ntug, tsis pub leej twg hla nej lub
qhov rooj tawm mus li. 23 Thaum
HUAB TAIS tuaj hla Hais Nkws Tos teb
thiab tso xwv txheej rau, nws yuav pom
cov ntshav ntawm daim txiag saum qhov
rooj thiab ntawm ob tug ncej puab rooj,
ces nws yuav hla plaws lub qhov rooj
ntawd, tsis cia tus txo neeg txoj sia nkag
mus hauv nej cov tsev, rhuav nej. 24 Nej
yuav khaws cov kab ke no rau nej thiab
nej cov me tub me nyuam kom coj mus ib
txhis. 25 Thaum nej mus txog lub teb
chaws uas HUAB TAIS muab rau nej
nyob, raws li nws tau hais, nej kuj yuav
ua cov kab ke no thiab. 26 Yog nej cov
tub nug nej tias : 'Cov kab ke no muaj lub
ntsiab dab tsi ?' 27 Mas nej yuav hais
tias : 'Yog cov kab ke txi HUAB TAIS
hmo Hla, uas nws tau hla cov His Xas
Lais cov tsev nyob Hais Nkws Tos teb,
thaum nws coj xwv txheej tuaj rau Hais
Nkws Tos teb, nws txuag peb cov tsev."
Ces tsoom pej xeem txhos caug thiab
khoov pe. 28 Cov His Xas Lais rov mus
tsev, lawv ua raws li HUAB TAIS tau
hais rau Mais Xes thiab As Loos nkawd.

Cov tub hlob Hais Nkws Tos tuag.

12 : 29 - 34.

29 Thaum ib tag hmo, HUAB TAIS tua txhua tus tub hlob nyob Hais Nkws Tos teb tuag tas huv si. Fas Las Oos tus tub hlob uas yuav zaum nws lub theej kiab kuj tuag, tus neeg raug txim nyob hauv tsev loj faj tus tub hlob kuj tuag, cov tsiaj txhu cov me nyuam thawj phaum kuj tuag tas tib si. 30 Ib tag hmo, Fas Las Oos sawv los, nws cov tub txib kuj sawv, tas tsoom Hais Nkws Tos sawv daws sawv los, ces suab quaj suab nyiav nrov nroo ntws thoob plaws Hais Nkws Tos teb, vim tsis muaj ib lub tsev uas tsis muaj ib tug tuag li. 31 Fas Las Oos hu Mais Xes thiab As Loos tuaj thaum ib tag hmo, nws hais rau nkawd tias :

"Nej sawv, nej kхиav tawm hauv kuv haiv neeg mus, tas nrho nej cov neeg His Xas Lais tib si, nej mus tsob hwb HUAB TAIS raws li nej tau thov. 32 Nej sau nej cov tsiaj me thiab tsiaj loj nrog nej mus raws li nej tau thov, nej kav tsij tawm mus. Nej thov kom Ntuj foom hmoov zoo rau kuv."

33 Cov Hais Nkws Tos kuj txhib cov His Xas Lais kom tawm hauv lub teb chaws mus sai sai, lawv hais tias :

"Tsam peb tuag tas tib si thiab."

34 Ces cov His Xas Lais sawb sim zoj zeeg, lawv sua lawv tej ncuav tseem tsis tau su, lawv muab khaub ncaws qhvw lawv tej tawb rau ncuav mov kwv saum xub pwg.

Cov His Xas Lais sau cov Hais Nkws Tos tej nyiaj tej kub.

12 : 35 - 36.

35 Cov His Xas Lais ua raws li Mais Xes tau hais rau lawv, lawv thov tej yam uas yog nyiaj thiab yog kub ntawm cov Hais Nkws Tos thiab thov ris tsho. 36 HUAB TAIS ua kom cov Hais Nkws

Tos ua siab zoo rau cov His Xas Lais thiab kam muab txhua yam rau lawv. Ces cov His Xas Lais thiab txeeb tau cov Hais Nkws Tos tej nyiaj tej kub li no.

Cov His Xas Lais sawv kev.

12 : 37 - 42.

37 Cov His Xas Lais sawv kev ntawm Las Xes mus rau Xws Kos, lawv muaj ze ntawm rau pua txhiab leej neeg mus ko taw, tsuas suav cov txiv neej xwb, tsis suav lawv tsev neeg. 38 Ib pab neeg coob coob sib xyaws daws nrog lawv mus. Tseem muaj tej pab tsiaj loj thiab tsiaj me coob coob nrog lawv mus thiab.

39 Lawv muab cov hmoov uas do tsis tau su ci tau tej lub ncuav tsis su noj : luag ntiab lawv tawm hauv Hais Nkws Tos teb mus sai sai, ces lawv tsis muaj sij hawm tos ntxiv thiab ntim tsis tau txhiam xws noj taug kev. 40 Cov His Xas Lais nyob Hais Nkws Tos teb tau plaub puas peb caug xyoo. 41 Hnub uas puv plaub puas peb caug xyoo ntawd, HUAB TAIS tsoom tub ki tawm hauv Hais Nkws Tos teb mus. 42 Hmo ntawd HUAB TAIS tau hhub tsoom His Xas Lais, nws ua kom lawv tawm ntawm Hais Nkws Tos teb mus, yog ib hmos uas tsoom tub ki His Xas Lais yuav cav txog HUAB TAIS txheej dhau txheej tiam dhau tiam.

Cov Hais Nkws Tos caum cov His Xas Lais. 14 : 5 - 14.

14 5 Thaum lawv hais rau tus vaj Hais Nkws Tos tias cov His Xas Lais twb kхиav tas lawm, mas Fas Las Oos thiab nws cov tub txib hloov siab, lawv hais tias : "Peb ua dab tsi li ntawd ? Peb tso cov His Xas Lais mus ces yuav tsis muaj neeg ua

peb qhev lawm."

6 Ces Fas Las Oos caij nws lub tsheb rog thiab coj nws cov tub rog. 7 Nws coj rau pua lub tsheb rog, uas yog cov zoo tshaj, thiab tas nrho cov tsheb rog nyob Hais Nkws Tos, lub tsheb twg kuj muaj tub rog puv nkaus.

8 HUAB TAIS ua kom Fas Las Oos uas yog tus vaj Hais Nkws Tos lub siab tawv qhawv tuaj. Ces nws sawv kev mus caum cov His Xas Lais uas tawm hauv lub teb chaws mus lawm.

9 Cov Hais Nkws Tos mus caum tau cov His Xas Lais ntawm ntug dej ntuj, uas lawv tsa tsev tsam phooj so nyob ntawd. Fas Las Oos cov nees, cov tsheb rog thiab cov tub rog tuaj txog, yog ze ntawm Pis Has His Los, nyob ncaj Npas Xes Foos.

10 Thaum Fas Las Oos tuaj txog ze lawm, cov His Xas Lais ntsia pom cov Hais Nkws Tos tuaj caum lawv. Cov His Xas Lais ntshai kawg, lawv quaj hu HUAB TAIS.

11 Lawv hais rau Mais Xes tias :

"Puas yog vim nyob Hais Nkws Tos teb tsis muaj qhov ntxa rau peb, koj thiaj li coj peb los tuag rau hauv teb chaws suab puam no ? Koj coj peb tawm Hais Nkws Tos teb los zoo dab tsi ?

12 Thaum nyob Hais Nkws Tos teb, peb yeej hais rau koj tias cia peb nyob ua cov Hais Nkws Tos qhev twj ywm. Yog peb nyob ua lawv qhev twj ywm yuav zoo dua tuaj tuag nyob teb chaws suab puam."

13 Mais Xes hais rau lawv tias :

"Nej tsis txhob ntshai ! Nej ua siab ruaj nreb ces hnub no nej yuav pom HUAB TAIS ua dab tsi los cawm nej, vim cov Hais Nkws Tos uas nej pom hnub no, nej yuav tsis pom ib zaug ntxiv lawm.

14 HUAB TAIS yuav ntaus rog thaiv nej, hos nej, mas nej tsuas nyob twj ywm ntsia xwb."

Cov His Xas Lais hla Dej Ntuj Liab.

14 : 15 - 31.

15 HUAB TAIS hais rau Mais Xes tias : "Vim li cas koj thiaj hu kuv cuag li ntawd ? Koj hais rau cov His Xas Lais kom lawv rov sawv kev mus ntxiv.

16 Koj yuav tsa koj rab pas thiab xyab koj txhais tes rau saum dej ntuj, koj yuav faib dej ua ob sab, kom cov His Xas Lais tau taug kev qhuav qhawv hauv qab thu dej mus. 17 Kuv yuav ua kom cov Hais Nkws Tos lub siab tawv qhawv tuaj, lawv yuav caum cov His Xas Lais qab hla hauv qab thu dej mus thiab, ces kuv yuav siv Fas Las Oos thiab nws cov tub rog, nws cov tsheb rog thiab cov tsav tsheb los ua kom kuv nto koob meej. 18 Thaum kuv siv Fas Las Oos thiab nws cov tsheb rog thiab cov tsav tsheb ua kom kuv nto koob meej lawd, cov Hais Nkws Tos mam yuav paub tias kuv yog HUAB TAIS tiag."

19 Tswv Ntuj tus Tshiab uas mus ua tsoom His Xas Lais ntej, hloov chaw mus thaiv tom lawv qab : ces tus ncej huab nyob ntawm lawv hauv ntej txav chaw mus nyob tom lawv qub qab. 20 Nws mus nyob nruab nrab kem tog Hais Nkws Tos ntawm tog His Xas Lais. Twv huab dub nciab tsaus nti ib hmos thaiv lawv, ces hmo ntawd ib hmos, ib tog txav tsis ti ib tog li. 21 Mais Xes tsa tes rau saum dej ntuj, ces HUAB TAIS ua cua hlob hlob ntsawj toob fab tuaj thawb cov dej ib hmos, qab thu dej tawm qhuav qhawv los, hos dej faib ua nyob ob sab. 22 Cov His Xas Lais nkag hauv hiav txwv, lawv tsuj av qhuav qhawv mus, nyob ntawm lawv sab xis thiab sab laug muaj ob lub phab ntsa dej. 23 Cov Hais Nkws Tos caum lawv qab : Fas Las Oos cov nees, cov tsheb rog thiab cov tsav tsheb nkag mus

hauv dej ntuj caum cov cov His Xas Lais.
 24 Thaum yuav kaj ntug, HUAB TAIS nyob saum tus ncej huab hluav taws, ntsia pom cov Hais Nkws Tos. Nws ua kom cov Hais Nkws Tos tau ntshai kawg.
 25 Nws ua kom lawv cov log tsheb daig thiab ntog qeeb qeeb. Cov Hais Nkws Tos hais tias :

"Peb khiav mus deb ntawm cov His Xas Lais vim HUAB TAIS pab lawv tawm tsam ntaus cov Hais Nkws Tos !"

26 HUAB TAIS hais rau Mais Xes tias : "Koj tsa tes rau saum dej ntuj, kom dej ntws rov los nyab cov Hais Nkws Tos thiab lawv cov tsheb rog thiab cov tsav tsheb tib si."

27 Mais Xes tsa tes rau saum dej ntuj, ces thaum pib kaj ntug, dej ntws rov los nyob qhov qub chaw. Cov Hais Nkws Tos tig khiav rov qab, tiam sis dej npbau nphwv los npog lawv, HUAB TAIS ua kom lawv ntxeev zom zaws rau hauv dej ntuj. 28 Cov dej npbau rov los nyob qhov qub, los npog cov tsheb thiab cov tsav tsheb Hais Nkws Tos uas tau nkag mus hauv qab thu dej caum cov His Xas Lais, tsis dim ib tug li. 29 Hos cov His Xas Lais tau taug kev qhuav nyob hauv plawv dej ntuj, cov dej ua ob sab phab ntsa nyob ntawm lawv sab xis thiab sab laug. 30 Hnub ntawd, HUAB TAIS cawm cov His Xas Lais dim ntawm cov Hais Nkws Tos txhais tes. Cov His Xas Lais pom cov Hais Nkws Tos taug pawg lug ntawm ntug dej ntuj. 31 Cov His Xas Lais pom HUAB TAIS lub peev xwm uas nws siv los tiv yeej cov Hais Nkws Tos. Tsoom pej xeem sawv daws hwm HUAB TAIS. Lawv tso siab rau HUAB TAIS thiab rau nws tus tub txib Mais Xes.

Cov His Xas Lais hu nkauj.

15 : 1 - 4 + 8 - 18.

15 1 Ces Mais Xes thiab tsoom tub ki His Xas Lais hu nkauj cav txog HUAB TAIS li no :

"Kuv hu nkauj cav txog HUAB TAIS, vim nws yeej thiab nws muaj koob meej, nws tau muab tus nees thiab tus caij nees pov rau hauv hiav txwv.

2 HUAB TAIS yog kuv lub zog, nws yog tus ua kom kuv zoo siab hu nkauj, nws npo kuv dim. Nws yog kuv tus Tswv Ntuj, kuv cav txog nws, vim nws yog kuv txiv tus Tswv Ntuj. 3 HUAB TAIS yog ib tug tseem tub rog, nws lub npe yog HUAB TAIS. 4 HUAB TAIS muab Fas Las Oos cov tsheb rog thiab cov tub rog pov rau hauv dej ntuj tas. Dej Ntuj Tiaj Tauj nqos nws cov thawj tub rog tas tib si. 8 Koj tshuab ib pas ntawm koj qhov ntswg, dej cia li nce siab zuj zus, dej sawv ntseg puav tam li ib sab phab ntsa zeb. Qab thu dej tawm plaws los qhuav qhawv. 9 Yeeb ncuab hais tias :

"Kuv mus caum lawv, kuv yuav caum cuag xwb, kuv yuav faib lawv lub cuab tam. Kuv yuav zoo siab. Kuv yuav rho hlo kuv rab ntaj, kuv txhais tes yuav txo lawv txoj sia."

10 Koj tshuab ib pas ntawm koj qhov ncauj, dej rov hlo los npog nkaus lawv, lawv tog ntsuag qees xws li ib co qe hlau nyob hauv cov dej npbau nphwv.

11 Nyob hauv tas tsoom dab, leej twg thiaj zoo li koj, HUAB TAIS ? Leej twg thiaj ntshiaib cuag koj txoj kev ntshiaib, txaus ntshai cuag koj, vim koj ua tau tej yam txaus qhuas ? 12 Koj xyab koj txhais tes xis, av nrrib pleb nqos lawv tag.

13 Koj hlub haiv neeg uas koj tau cawm, koj coj lawv khiav mus, koj lub zog coj lawv kev, lawv thiaj mus txog thaj chaw ntshiaib. 14 Cov haiv neeg hnov txog, lawv ntshai tshee na, cov neeg nyob Fis Lis Tis ntshai rwg. 15 Cov nom tswv

nyob Es Dos poob siab tas, cov thawj coj nyob Muas tsis muaj zog tas, tas nrho cov neeg nyob Kas Nas Has ib ce tuag tas. 16 Tas saww daws poob siab thiab ntshai kawg : HUAB TAIS, koj txhais npab muaj hwj chim ua kom lawv nyob txhav qhi ua tsis taus zog, thaum koj haiv neeg hla ntawm lawv, thaum haiv neeg uas koj tau txhiv los hla ntawm lawv.

17 HUAB TAIS, koj yuav coj koj haiv neeg mus, koj yuav muab lawv cog rau saum lub roob uas yog koj li, thaj chaw uas yog koj lub tsev nyob, qhov chaw uas yog koj ob txhais tes npaj cia. 18 HUAB TAIS yuav ua vaj nyob mus li tas ib txhiab ib txhis."

Cov mov Mas Nas thiab cov yij.

16 : 1 - 36.

16 1 Tas tsoom tub ki His Xas Lais tso lub zos Es Lis tseg, lawv sawv daws mus txog lub hav suab puam Xees, nyob nruab nrab ntawm Es Lis thiab lub roob Xis Nais, yog hnub tim kaum tsib, lub hli ob txij hnub lawv tawm Hais Nkws Tos teb los. 2 Tas tsoom tub ki His Xas Lais cem cem yws yws rau Mais Xes thiab As Loos nkawd nyob hauv teb chaws suab puam. 3 Cov His Xas Lais hais rau nkawd tias :

"Kheev lam HUAB TAIS txhais tes tua kom peb tuag tas nyob Hais Nkws Tos teb, thaum peb zaum ncig tej niag lauj kaub nqaij thiab peb muaj mov noj tsau plab npo mas ! Peb paub tseeb tias neb coj peb los nyob hauv lub hav suab puam no kom peb sawv daws tuag tshaib tas xwb !"

4 Ces HUAB TAIS hais rau Mais Xes tias :

"Kuv yuav ua kom mov poob saum txheej ntuj saud los rau nej noj. Cov neeg yuav

niaj tag kis tawm mus khaws kom txaus rau lawv noj hnub ntawd xwb, kuv xav sim lawv, kuv thiaj paub tias lawv puas mloog kuv txoj cai los tsis mloog. 5 Hnub rau, thaum lawv muab qhov lawv mus khaws tau lawm los ua noj, mas yuav tsum muaj npaum li qhov lawv niaj hnub khaws ob npaug."

6 Mais Xes thiab As Loos nkawd hais rau tas tsoom His Xas Lais tias : "Ib tsam tsaus ntuj, nej yuav paub tseeb tias yog HUAB TAIS coj nej tawm Hais Nkws Tos teb los, 7 ces tag kis sawv ntxov nej yuav pom HUAB TAIS lub hwj chim loj. Vim nws hnov nej cov lus yws lus cem txog nws lawm. Ntawm wb, mas wb ua tsis tau tus dab tsi, ua cas nej thiaj pheej yws thiab cem rau wb ?"

8 Mais Xes hais tias :

"Ib tsam tsaus ntuj, HUAB TAIS yuav muab nqaij rau nej noj, hos tag kis sawv ntxov, nws yuav muab mov rau nej noj kom tsau nej plab, vim HUAB TAIS tau hnov nej yws nej cem txog nws. Ntawm wb, wb ua tau dab tsi ? Nej cov lus cem lus yws tsis raug wb, tab sis raug HUAB TAIS xwb."

9 Mais Xes hais rau As Loos tias :

"Koj hais rau tas tsoom His Xas Lais tias : Nej cia li txav los ze ntawm HUAB TAIS xub ntiag, vim nws tau hnov nej cov lus yws lus cem lawm."

10 Ces thaum As Loos tab tom hais lus rau tas tsoom His Xas Lais, lawv tig mus ntsia tom sab hav suab puam, lawv pom HUAB TAIS lub hwj chim tawm los nyob saum cov huab. 11 HUAB TAIS hais lus rau Mais Xes hais tias :

12 "Kuv tau hnov cov His Xas Lais tej lus yws lus cem lawm. Koj hais cov lus no rau lawv : Thaum yuav tsaus ntuj, nej yuav tau nqaij noj, thaum kaj ntug, nej yuav tau mov noj kom tsau plab. Ces nej

yuav paub tias kuv yog HUAB TAIS nej tus Tswv Ntuj tiag."

13 Thaum tsaus ntuj, muaj ib co yij ya tuaj tsaws puv thaj chaw lawv nyob, hos thaum sawv ntxov, muaj ib txheej lwg dawb paug puv ib ncig thaj tsam lawv nyob. 14 Thaum cov lwg ntawd qhuav tas, ces txawm pom ib co hmoov mos mos, ua tsig daws, zoo li ib co te, nyob saum npoo av suab puam. 15 Thaum cov His Xas Lais pom li ntawd, lawv sib nug zom zaws tias :

"Cov ntawd yog dab ts'i ?"

Vim lawv yeej tsis paub tias yog dab ts'i tiag. Mais Xes hais rau lawv tias :

"Cov ntawd, yog cov mov uas HUAB TAIS muab pub rau nej noj. 16 HUAB TAIS tau ceeb toom li no : Nej yuav tsum nyias khaws kom txaus nyias noj xwb, khaws ib tug neeg ib taig xwb. Nej khaws kom txaus nej yim neeg hauv nej lub tsev tsam phooj xwb."

17 Cov His Xas Lais ua raws li ntawd, lawv ib txhia khaws ntau ib txhia khaws tsawg. 18 Thaum lawv muab tais luj, tus khaws ntau, nws kuj tsis tau ntau tshaj tus khaws tsawg, hos tus khaws tsawg, nws kuj khaws tau txaus noj thiab, lawv nyias khaws kom txaus nyias noj.

19 Mais Xes hais rau lawv tias : "Nej tsis txhob khaws tshaj coj los cia rau tag kis."

20 Muaj ib txhia tsis mloog Mais Xes hais, lawv khaws tshaj coj los cia rau tag kis, ces txawm muaj kas noj thiab lwj tas.

Mais Xes npau taws rau lawv kawg. 21 Lawv niaj tag kis mus khaws, nyias khaws kom txaus nyias noj xwb, thaum lub hnub tuaj sov lawm, cov ntawd txawj yaj tas mus. 22 Hnub rau, lawv khaws ob npaug, ib tug neeg ob taig, ces cov thawj coj mus hais qhia Mais Xes paub.

23 Mais Xes hais rau lawv tias :

"HUAB TAIS hais li no : tag kis yog ib hnub uas nej yuav so tiag, yog ib hnub ntshiab rau HUAB TAIS, yog hnub xas npas tos. Nej xav ua noj li cas los nej ua, nej xav hau noj li cas los nej hau, qhov seem, nej muab khaws cia rau tag kis."

24 Ces lawv khaws qhov seem cia rau tag kis li Mais Xes tau hais, txawm tsis lwj thiab tsis muaj kas nyob hauv. 25 Mais Xes hais tias :

"Hnub no, nej noj qhov seem ntawd xwb, vim hnub no yog hnub xas npas tos, HUAB TAIS caiv, hnub no nej yuav mus nrhiav tsis tau nyob tom teb. 26 Rau hnub, mas nej niaj hnub mus khaws, tiam sis hnub xya, yog hnub xas npas tos, mas yuav tsis muaj rau nej khaws."

27 Tiam sis hnub xya, muaj ib co neeg tseem tawm mus khaws thiab uas lawv nrhiav tsis tau dab ts'i li. 28 HUAB TAIS hais rau Mais Xes tias :

"Nej yuav tawv tsis mloog kuv cov lus qhia thiab kuv cov kev cai mus txog thaum twg ? 29 Nej yuav tsum to taub, HUAB TAIS muab hnub xas npas tos rau nej nyob, vim li ntawd, hnub rau nws thiaj muab mov kom txaus rau nej noj ob hnub. Hnub xya, nej yuav tsum so, nyias nyob twj ywm nyias qhov chaw, tsis pub kom leej twg tawm hauv nws tsev mus sab nraud li."

30 Ces tsoom pej xeem thiaj li tsis ua hauj lwm hnub xya. 31 Tsev neeg His Xas Lais hu cov mov ntawd ua Mas Nas. Cov mov Mas Nas zoo li ib co noob zaub txhwb, dawb dawb thiab qab li ib co ncuav xyaw zib mu. 32 Mais Xes hais tias :

"HUAB TAIS hais li no : Nej yawm kom puv ib taig, nej muab khaws cia rau nej cov xeeb zeej xeeb ntxwv tom qab, kom lawv tau pom cov mov kuv muab rau nej noj nyob teb chaws suab puam, thaum

kuv coj nej tawm hauv Hais Nkws Tos
teb los."

33 Mais Xes hais rau As Loos tias :

"Koj muab ib lub hub me, koj luj ib taig
Mas Nas los hliv rau hauv, koj coj mus
txawb rau ntawm HUAB TAIS xub ntiag
kom tsis txhob lwj, ces nej cov xeeb
ntxwv tom qab thiaj yuav tau pom."

34 As Loos ua raws li HUAB TAIS tau
hais rau Mais Xes. Nws muab tais Mas
Nas coj mus tso rau ntawm lub Xab Cog
Lus, kom tsis txawj lwj.

35 Cov His Xas Lais noj mov Mas Nas
tau plaub caug xyoo, mus txog thaum
lawv los tshwm rau lub teb chaws muaj
neeg nyob. Lawv noj mov Mas Nas mus
txog thaum lawv tsiv los txog ntawm
ciam teb Kas Nas Has. 36 Ib taig yog
ntau npaum li ib feem kaum ntawm ib
kawg.

tuag dej ?"

4 Mais Xes tsa suab hu HUAB TAIS
hais tias :

"Kuv yuav ua li cas rau haiv neeg no ?
Tshuav me ntsis xwb ces lawv yuav xuas
pob zeb txawb kuv."

5 HUAB TAIS hais rau Mais Xes tias :

"Koj mus ua tsoom pej xeem ntej, koj coj
ob peb tug txwj laus His Xas Lais nrog
koj mus. Koj nqa koj rab pas nrig ntawm
tes, yog rab pas uas koj tau siv los ntaus
tus niam dej nyob Hais Nkws Tos, koj
mus. 6 Kuv yuav mus ua koj ntej, saum
lub tsua, nyob saum roob Hos Les tos koj
tuaj. Koj yuav ntaus lub tsua, ces dej
yuav txhawv tawm los rau tsoom pej
xeem haus."

Mais Xes ua raws li ntawd, cov txwj laus
His Xas Lais ntsia ntsoov nws ua.

7 Mais Xes tis npe rau thaj chaw ntawd
hu ua Mas Xas thiab Mes Lis Npas, vim
nyob ntawd, cov His Xas Lais nrhiav lus
rau nws thiab lawv sim HUAB TAIS,
lawv hais tias :

"HUAB TAIS puas nrog peb nyob los tsis
nrog ?"

Dej txhawv ntawm phab tsua los.

17 : 1 - 7.

17 1 Tsoom tub ki His Xas Lais tso
lub hav suab puam Xees tseg,

lawv mus ntxiv raws li HUAB TAIS tau
hais kom lawv yuav tsum maj mam tsiv
zuj zus ib qho rau ib qho. Lawv los tsa
tsev nyob rau Les Fis Dis, nyob ntawd
tsis muaj dej rau tsoom pej xeem haus.
2 Ces lawv npau taws rau Mais Xes,
lawv hais tias :

"Koj cia li muab dej los rau peb haus !"

Mais Xes hais rau lawv tias :

"Vim li cas nej npau taws rau kuv ? Vim
li cas nej xav sim HUAB TAIS ?"

3 Tsoom pej xeem nqhis dej, lawv yws
yws rau Mais Xes tias :

"Ua cas koj thiaj coj peb tawm Hais
Nkws Tos teb los ? Puas yog koj xav
kom kuv tuag dej, kuv thiab kuv cov me
nyuam thiab kuv cov tsiaj peb sawv daws

**Lawv nrog cov As Mas Les tawm
tsam. 17 : 8 - 16.**

8 Cov As Mas Les tuaj ntaus cov His Xas
Lais, ces lawv sib tawm tsam nyob Les
Fis Dis. 9 Mais Xes hais rau Yos Xuas
tias :

"Koj xaiv ib pab txiv neej nrog koj, tag
kis koj tawm mus ntaus cov As Mas Les;
hos kuv, mas kuv yuav mus nyob saum
lub ncov roob, tuav rawv Tswv Ntuj rab
pas ntawm tes."

10 Yos Xuas ua raws li Mais Xes hais
rau nws, nws tawm mus ntaus cov As
Mas Les, hos Mais Xes, As Loos thiab
Hwm lawv nce mus saum lub ncov roob.

11 Yog tias Mais Xes tsa nws ob txhais tes twj ywm, ces tog His Xas Lais yeej, yog nws tso nws ob txhais tes dauv, ces tog As Mas Les yeej. 12 Thaum Mais Xes tsaug leeg npab lawm, lawv muab ib lub pob zeb los rau Mais Xes zaum. Mais Xes zaum saum lub pob zeb, hos As Loos thiab Hwm nkawd txheem nws ob txhais tes, ib leeg nyob ib sab. Lawv ua li ntawd ces nws ob txhais tes thiaj tsa tas mus li txog thaum hnub poob qho. 13 Ces Yos Xuas xuas ntaj los ntaus yeej As Mas Les thiab nws haiv neeg. 14 HUAB TAIS hais rau Mais Xes tias :

"Koj muab tej ntawd sau cia rau hauj ib phau ntawv kom tau khaws tseg, thiab koj hais rau Yos Xuas tias kuv yuav rhuav As Mas Les kom ploj ntais hauv lub qab ntuj khwb no mus, yuav tsis muaj neeg nco qab txog nws ntxiv."

15 Ces Mais Xes txhim ib lub thaj txi Ntuj, nws tis npe hu ua HUAB TAIS Nis Xis. 16 Lub npe no txhais tias :

"Tuav rawv HUAB TAIS tus chij ntawm tes ! Vim HUAB TAIS tau tsa rog ntaus As Mas Les mus txheej dhau txheej."

Mais Xes tsa ib co txwj laus txiav txim. 18 : 13 - 27.

18 13 Tag kis tom qab, Mais Xes zaum ntawm lub rooj txiav txim rau tsoom pej xeem. Tsoom pej xeem tuaj sawv ntsug ze ntawm nws txij sawv ntxov txog tsaus ntuj. 14 Mais Xes yawm txiv pom nws ua ntau yam rau tsoom pej xeem, nws hais rau Mais Xes tias :

"Koj ib leeg xwb, yuav ua cas thiaj ua tas tej hauj lwm ntawd rau tsoom pej xeem ? Ua cas koj ib leeg los zaum txiav txim rau lawv xwb, hos lawv tuaj zov koj txij sawv ntxov txog tsaus ntuj li ?"

15 Mais Xes teb rau nws yawm txiv tias : "Tsoom pej xeem tuaj cuag kuv, kom lawv paub tias Tswv Ntuj xav li cas. 16 Thaum lawv muaj ib qho teeb meem, mas lawv tuaj cuag kuv. Kuv txiav txim rau ib leeg zuj zus, thiab kuv qhia Tswv Ntuj cov txhooj thiab cov kev cai rau lawv."

17 Mais Xes yawm txiv teb rau Mais Xes tias :

"Koj ua li ntawd mas tsis zoo ! 18 Tsis ntev ces yuav dhuav koj, thiab yuav dhuav tsoom neeg nrog koj nyob, vim txoj hauj lwm ntawd hnyav dhau rau koj. Koj ib leeg xwb yuav ua tsis tas npaud.

19 Zaum no, koj mloog kuv qhia ib zaj tswv yim rau koj, thov kom Tswv Ntuj pab koj. Koj txoj hauj lwm yog sawv tsoom pej xeem chaw nyob ntawm Tswv Ntuj xub ntiag, yog cev lawv cov lus rau Tswv Ntuj. 20 Koj yog tus qhia Tswv Ntuj cov txhooj thiab cov kev cai rau lawv, yog tus qhia txoj kev lawv yuav tsum taug ua neej rau lawv thiab qhia tus yeeb yam zoo lawv yuav tsum coj. 21 Tiam sis koj yuav tsum xaiv ib cov txiv neej muaj peev xwm, uas lawv hwm Ntuj, thiab koj ntseeg tau lawv siab, thiab yuav tsis dag, koj tsa lawv ua thawj saib tsoom neeg. Koj tsa ib co saib txhiab leej, ib co saib pua leej, ib cov saib tsib caug leej hos ib co saib kaum leej.

22 Lawv yog cov yuav txiav txim rau tsoom pej xeem txhua lub sij hawm. Tej yam teeb meem loj, lawv mam tso rau koj txiav txim, tej yam teeb meem me, cia lawv txiav lawv. Li no mas koj hauj lwm yuav sib, vim muaj cov neeg pab koj nres. 23 Yog koj ua li no, thov kom Tswv Ntuj pom zoo thiab, mas koj thiaj li yuav ua taus ntev, thiab tas tsoom neeg uas tuaj ntawd thiaj yuav muaj siab kaj lug rov qab mus nyias vaj nyias tsev."

24 Mais Xes yuav raws li nws yawm txiv hais, nws ua tas puas tsav Yam raws li ntawd. 25 Mais Xes xaiv ib pab txiv neej muaj peev xwm, nws tsa lawv ua thawj coj saib tsoom pej xeem : ib co saib txhiab leej, ib co saib pua leej, ib co saib tsib caug leej, ib co saib kaum leej. 26 Lawv txiav txim rau tsoom neeg txhua lub sij hawm. Tej Yam teeb meem loj, lawv xa los rau Mais Xes, hos tej Yam teeb meem me, lawv txiav lawv rau tas huv si. 27 Ces Mais Xes tso nws yawm txiv rov qab mus, nws yawm txiv taug kev rov mus nws lub teb chaws lawm.

yuav saib nej yog kuv tug nyob hauv tas txhua haiv neeg, vim lub ntiaj teb yog kuv li tas huv si. 6 Kuv yuav saib nej yog ib haiv neeg ua leej choj thiab yog ib haiv neeg qee rau Ntuj. Cov lus no yog cov uas koj yuav hais rau cov His Xas Lais."

7 Mais Xes thiaj hu cov txwj laus saib tsoom pej xeem tuaj, nws qhia lawv tas puas tsav Yam uas HUAB TAIS tau hais rau nws. 8 Ces tas tsoom pej xeem sawv daws pom zoo ua ib lub suab teb tias : "Tas puas tsav Yam HUAB TAIS tau hais, mas peb yuav ua tib si."

Mais Xes qhia tsoom pej xeem cov lus rau HUAB TAIS.

**Lawv los txog lub roob Xis Nais.
19 : 1 - 2.**

19 1 Tsoom tub ki His Xas Lais tawm Hais Nkws Tos teb los tau peb lub hlis lawm. Lawv thiaj los txog lub teb chaws suab puam Xis Nais. 2 Lawv sawv kev Les Fis Dis los, lawv los txog lub hav suab puam Xis Nais, ces lawv tsa tsev nyob hauv lub hav suab puam, cov His Xas Lais tsa tsev ncaj ntawm lub roob Xis Nais sab tid.

HUAB TAIS qhia tias nws yuav nrog lawv cog lus. 19 : 3 - 14.

3 Ces Mais Xes nce mus ntsib Tswv Ntuj saum lub roob. HUAB TAIS hu saum roob tuaj rau Mais Xes tias : "Koj yuav hais li no rau Yas Kos tsev neeg, koj yuav tshaj rau cov His Xas Lais tias : 4 Nej tau pom ntawm nej qhov muag tias kuv tau ua li cas rau cov Hais Nkws Tos, thiab kuv tau coj nej tawm xws li yog ya saum dav ob phab tis, kuv tau coj nej los cuag kuv. 5 Txij no mus, yog nej mloog kuv lus thiab nej khaws nraim kuv lo lus kuv cog rau nej, mas kuv

9 HUAB TAIS hais rau Mais Xes tias : "Kuv yuav tuaj ntsib koj saum ib tauv huab tuab tuab tsaus nti, kom cov neeg hnov kuv nrog koj hais lus, ces lawv thiaj yuav ntseeg koj mus li."

Ces Mais Xes qhia tsoom pej xeem cov lus rau HUAB TAIS. 10 HUAB TAIS hais rau Mais Xes tias : "Koj mus ntsib tsoom pej xeem, koj hais rau lawv kom hnub no thiab tag kis, lawv tu lawv kom lawv dawb huv ntshiab si, kom lawv ntxhua lawv cov ris tsho, 11 lawv ua tas puas tsav Yam kom tiav tos nag kis, vim nag kis, HUAB TAIS yuav nqes los rau tsoom pej xeem txhua tus pom nyob saum lub roob Xis Nais. 12 Koj yuav tu ciamb rau cov neeg kom txhob hla mus saum lub ncov roob, koj hais li no : 'Nej yuav tsis txhob nce mus saum lub ncov roob li, tab yog txav ze xwb los tsis tau. Leej twg mus chwv lub ncov roob, mas tus ntawd yuav tuag. 13 Yuav tsis pub leej twg tsa tes tua tus neeg ntawd, yuav tsum xuas pob zeb txawb los yog xuas hneev tua nws xwb. Txawm yog neeg los yog tus tsiaj kuj xij, nws yuav tsum tuag.' Thaum lub hom nrov ib suab ntev ntev, mas thaum ntawd

txog caij cov neeg pib nce mus saum roob."

14 Ces Mais Xes nqes saum roob los, nws mus cuag tsoom pej xeem. Nws hais sawv daws kom tu cev huv. Ces lawv thiaj ntxhua lawv tej ris tsho huv si.
15 Mais Xes hais rau tsoom pej xeem hais tias :

"Nej npaj siab tos neeg kis, nej tsis txlob nrog poj niam pw."

Tswv Ntuj nqes los saum lub roob.
19 : 16 - 20.

16 Neeg kis kaj ntug, thaum sawv ntxov, xob quaj nroo ntws thiab xob laim saum roob tuaj, muaj ib tauv huab tsaus nti ntsauv lub roob. Sawv daws hnov ib lub suab hom nrov muaj zog kawg, hos nyob hauv lub yeej, tsoom pej xeem sawv daws ntshai tshee na. 17 Mais Xes hais kom sawv daws tawm hauv yeej mus, yuav mus ntsib Tswv Ntuj, ces sawv daws mus nyob nram taw roob. 18 Lub roob Xis Nais ncho pa lug, vim HUAB TAIS txia ua hluav taws nqes los nyob saud. Pa taws ncho lug cuag li tawm hauv ib lub qhov txos loj los, hos tas lub roob co qeeg nkaws ua zog koog. 19 Hnove lub suab hom nrov loj zuj zus tuaj, Mais Xes hais lus rau Tswv Ntuj, Tswv Ntuj teb hauv lub suab xob nroo tuaj. 20 HUAB TAIS nqes los nyob saum lub roob Xis Nais, saum lub ncov roob. HUAB TAIS hu Mais Xes kom mus cuag nws, ces Mais Xes nce mus saum lub ncov roob.

Tswv Ntuj kaum lo lus qhia.
20 : 1 - 21.

20 1 Tswv Ntuj hais cov lus no :
2 "Kuv yog HUAB TAIS, koj tus
Tswv Ntuj, yog tus ua kom koj dim

ntawm Hais Nkws Tos teb los, dim ntawm txoj kev ua luag qhev.

3 Koj yuav tsis txlob muaj dua lwm tus tswv ntuj.

4 Koj yuav tsis txlob puab ib tug mlom los ib tug duab zoo li tej yam nyob saum ntuj, los tej yam nyob hauv ntiaj teb no, los tej yam nyob hauv qab thu dej.

5 Koj yuav tsis txlob pe cov mlom ntawd, txlob tsob hwb lawv, vim kuv yog HUAB TAIS thiab yog koj tus Tswv Ntuj, kuv yog ib tug Tswv Ntuj muaj khib, cov uas ntxub kuv, mas kuv rau txim rau phaj tub thiab phaj xeeb ntxwv thiab phaj xeeb ntxwv cov xeeb ntxwv tom qab, vim phaj txiv tau ua txhaum rau kuv. 6 Hos cov nyiam kuv thiab ua raws kuv cov lus qhia, mas kuv hlub lawv thiab pub txiaj ntsha txiaj ntsim ntau rau txhiab leej vam leej mus tiam dhau tiam. 7 Koj yuav tsis txlob hu txog koj tus HUAB TAIS Tswv Ntuj lub npe mus ua tej yam tsis zoo, vim HUAB TAIS yuav tsis zam txim rau tus neeg uas tuav txog nws lub npe dog dig. 8 Koj yuav nco ntsoov caiv hnub xas npas tos, koj yuav muab saib ua ib hnub ntshiab. 9 Koj ua hauj lwm rau hnub, 10 tab sis hnub xya yog hnub caiv xas npas tos rau koj tus HUAB TAIS Tswv Ntuj. Koj yuav tsis txlob ua ib yam hauj lwm dab tsi li. Koj thiab koj tus tub, koj tus ntxhais, koj tus tub txib, koj tus ntxhais txib, koj cov tsiaj txhu, tus qhua uas tuaj nyob hauv koj tsev, nej sawv daws yuav tsis txlob ua hauj lwm li.

11 Vim tias HUAB TAIS tau ua hauj lwm rau hnub los tsim lub ntuj, lub ntiaj teb, lub hiav txwv, thiab tas puas tsav yam nyob hauv, tiam sis hnub xya nws so, vim li ntawd HUAB TAIS tau foom hmoov zoo rau hnub xya, nws muab hnub xya qee ua ib hnub ntshiab.

12 Koj yuav hwm koj niam thiab koj

txiv, koj thiaj yuav tau nyob ntev niaj ntau xyoo hauv lub ntiaj teb uas koj tus HUAB TAIS Tswv Ntuj muab pub rau koj.

13 Koj yuav tsis txhob tua neeg. 14 Koj yuav tsis txhob zes luag txij luag nkawm.

15 Koj yuav tsis txhob ua tub sab tub nyiag.

16 Koj yuav tsis txhob liam rau luag tej.

17 Koj yuav tsis txhob ntshaw txeeb luag vaj luag tsev. Koj yuav tsis txhob ntshaw txeeb luag tus poj niam, luag tus tub txib, luag tus ntxhais txib, luag tus nyuj los tus luj, los ib yam dab tsi uas yog luag tug."

18 Tas tsoom pej xeem pom tias xob quaj xob nroo nrov doog diaj thiab xob laim

liab vog, suab hom nrov doog diaj, hos lub roob ncho pa lug, ces lawv ntshai, lawv nyob nrug deb. 19 Lawv thiaj hais rau Mais Xes tias :

"Cia koj hais lus rau peb xwb, peb yuav mloog koj hais, kom Tswv Ntuj txhob hais lus rau peb, yog nws hais mas peb yuav tuag."

20 Mais Xes thiaj hais rau tsoom pej xeem tias :

"Nej tsis txhob ntshai, yog Tswv Ntuj xav sim nej siab nws thiaj tuaj, nws xav kom txoj kev ntshai nws nyob rawv hauv nej nruab siab, ces nej thiaj yuav tsis ua txhaum."

21 Tsoom pej xeem sawv nrug deb, hos Mais Xes txav mus ze ntawm twv huab dub nciab uas Tswv Ntuj nyob.

Yuav ua lub thaj txi Ntuj zoo li cas. 20 : 22 -26.

22 HUAB TAIS hais rau Mais Xes tias : "Koj yuav hais li no rau cov His Xas Lais : Nej tau pom xyeem ntawm nej qhov muag lawm tias kuv nyob saum ntuj

hais lus rau nej zoo li cas. 23 Nej yuav tsis txhob puab tej tus tswv ntuj uas yog nyiaj yog kub rau nej teev. 24 Nej yuav muab av los puab ib lub thaj txi Ntuj rau kuv. Nyob saud, nej yuav hlawv nej cov txim thiab tso nej cov tsiaj txi Ntuj, cov tsiaj loj thiab tsiaj me. Nyob txhua qhov chaw uas kuv xav kom nej nco txog kuv lub npe, mas kuv yuav tuaj thiab yuav foom hmoov zoo rau nej. 25 Yog nej ua ib lub thaj txi Ntuj pob zeb, mas nej tsis txhob siv pob zeb txaug, vim thaum nej siv rab txaug mas nej ua tsis huv rau lub thaj lawm. 26 Nej yuav tsis txhob ua ntaiv nce mus saum kuv lub thaj, vim thaum nej nce, cov qib ntaiv yuav pom nej qhov liab qab."

Yuav ua ncaj rau luag.

22 : 20 - 27.

22 20 "Koj yuav tsis txhob hiam, tsis txhob yuam tus pej kum neeg, vim thaud nej yog ib co pej kum neeg nyob Hais Nkws Tos teb. 21 Koj yuav tsis txhob lim hiam rau ib tug poj ntsuam los ib tug me nyuam ntsuag. 22 Yog koj lim hiam rau nws, nws hu txog kuv, mas kuv yuav mloog nws lub suab quaj.

23 Kuv yuav npau taws heev thiab yuav ua kom hniav ntaj txo koj txoj sia, ces koj poj niam yuav ua poj ntsuam thiab koj cov tub yuav ua tub ntsuag. 24 Yog koj qiv nyiaj rau tus kwv tij hauv koj haiv neeg, los rau ib tug pluag hauv koj haiv neeg, mas koj yuav tsis txhob noj nws, koj yuav tsis txhob tsub paj rau nws them. 25 Yog koj txais ib tug lub tsho ntev uas nws muab yuam nuj nqes rau koj, mas thaum hnub poob qho, koj yuav xa rov qab rau nws. 26 Nws tsuas muaj tib lub tsho ntawd ua pam vov thiab ua ris tsho hnav xwb, nws yuav pw zoo li cas ? Yog

nws hu txog kuv, kuv yuav mloog nws
lub suab quaj, vim kuv lub siab hhub neeg.
27 Koj yuav tsis txhob thuam Ntuj, tsis
txhob foom lus phem rau ib tug thawj coj
hauv koj haiv neeg."

**Mais Xes muab ntshav tsiaj los cog
lus. 24 : 1 - 11.**

24 1 HUAB TAIS hais rau Mais
Xes tias :

"Nej tuaj cuag HUAB TAIS. Koj nrog
As Loos, Nas Das, As Npis Hus thiab xya
caum leej txwj laus His Xas Lais, nej tuaj
nyob nrug deb txhos caug pe hauv av.

2 Mais Xes ib leeg yuav txav los ze
HUAB TAIS. Dua li cov yuav tsis txav
los, tsoom pej xeem yuav tsis txhob nrog
nej tuaj."

3 Mais Xes rov los hais HUAB TAIS cov
lus thiab cov kev cai qhia rau tsoom pej
xeem, tas sawv daws pom zoo koom ib
lub suab teb tias :

"Cov lus uas HUAB TAIS tau hais mas
peb yuav coj tas huv tib si."

4 Mais Xes muab HUAB TAIS cov lus
sau rau hauv ib phau ntawv cia, ces tag
kis, nws sawv ntxov, nws txhim ib lub
thaj txi Ntuj rau ntawm taw roob thiab
kaum ob tug ncej zeb rau kaum ob lub
xeem His Xas Lais. 5 Ces nws xa ib co
tub hluas His Xas Lais mus txi Ntuj, lawv
coj tej tus thav nyuj mus hlawv txi rau
HUAB TAIS. 6 Mais Xes cug cov tsiaj
ntawd cov ntshav, nws muab ib nrab rau
hauv phiab, nws muab ib nrab hliv ywg
lub thaj txi Ntuj. 7 Ces nws muab phau
ntawv cog lus los nyeem rau tsoom pej
xeem mloog, lawv qw tias :

"Txhua yam HUAB TAIS tau hais, peb
yuav coj thiab peb yuav mloog."

8 Mais Xes txawm muab cov ntshav los
nchos rau saum tsoom pej xeem sawv

daws, nws hais tias :

"Cov ntshav no yog ntshav cog lus,
HUAB TAIS tau nrog nej cog lus raws li
cov lus sau hauv phau ntawv."

9 Ces Mais Xes nce mus saum roob, As
Loos, Nas Das, As Npis Hus thiab xya
caum leej txwj laus His Xas Lais kuj nrog
nws mus. 10 Lawv tau pom cov His Xas
Lais tus Tswv Ntuj. Nyob ntawm Tswv
Ntuj qab xib taws, yog zoo li ib lub tiaj
pov haum ntsuab xiab, tshiab cuag li lub
ntuj ntsuab. 11 Tswv Ntuj tsis ua phem
rau cov txwj laus His Xas Lais. Lawv tau
ntsia Tswv Ntuj, tau pom nws tseeb tseeb,
lawv tseem noj mov thiab haus dej tib si.

**Mais Xes nyob plaub caug hnub
saum roob Xis Nais.**

24 : 12 - 18.

12 HUAB TAIS hais rau Mais Xes tias :
"Koj nce tuaj ntsib kuv saum roob, koj
yuav tuaj nyob ntev saud. Kuv yuav muab
ob daim txiag zeb rau koj. Kuv yuav
muab txoj cai thiab kuv cov lus qhia sau
rau saum ob daim txiag zeb kom koj tau
qhia rau tsoom tub ki His Xas Lais."

13 Mais Xes sawv, nws tus tub txib Yos
Xuas nrog nws mus. Nkawd ob leeg nce
mus saum Tswv Ntuj lub roob. 14 Mais
Xes hais rau cov txwj laus tias :

"Nej nyob ntawm no tos wb rov qab los
txog tso, As Loos thiab Hwm nrog nej
nyob. Yog leej twg muaj lus dab tsi, nej
nrog nkawd hais."

15 Ces Mais Xes nce dua saum roob
lawm. Pom twv huab ntsauv lub roob.

16 HUAB TAIS lub hwj chim tawm los
nyob saum roob Xis Nais, ces huab los
ntsauv lub roob tau rau hnub nkaus.
Hnub xya, HUAB TAIS nyob hauv twv
huab hu Mais Xes. 17 Cov His Xas Lais
pom HUAB TAIS lub hwj chim yog zoo

li ib co hluav taws cig hlob hlob nyob saum lub ncov roob. 18 Mais Xes nkag hauv twv huab, nws nce mus saum roob lawm. Nws nyob saud plaub caug hnub plaub caug hmo.

HUAB TAIS qhov chaw nyob.

**25 : 1 - 11; 26 : 1 + 7 + 15;
27 : 1 - 3.**

25 1 HUAB TAIS nrog Mais Xes

tham, nws hais tias :

2 "Koj hais rau cov tub ki His Xas Lais kom lawv sau nyiaj txiag tuaj pub rau kuv. Tus twg muaj lub siab xav pub tiag, koj mam sau ntawm nws. 3 Tej yam uas koj yuav txais ntawm lawv mas yog cov no : kub, nyiaj thiab tooj dub, 4 ntaub xia tsam xem, ntaub liab paj yeeb, liab doog, ntaub maj mos, thiab cov plaub tshis, 5 cov tawv yaj zas liab, tej tawv tsiaj nyias nyias, thiab cov txiag ntoo ntseej, 6 tej roj teeb, tej tshuaj tsw qab uas zoo xyaw roj pleev taub hau, thiab cov hmoov xyab tsw qab. 7 Cov pob zeb liab, thiab lwm yam pob zeb muaj nqi uas yuav coj los xaws rau daim ntaub npua xub pwg thiab daim ntaub npua hauv siab. 8 Koj yuav ua ib qho chaw teev kuv, kuv thiaj yuav tau nrog lawv nyob. 9 Koj yuav ua qhov chaw ntawd raws li tus piv txwv uas qhia txog lub Tsev Nyob thiab tus piv txwv qhia txog tej rooj tog nyob hauv, uas kuv yuav qhia rau koj.

10 Koj yuav muab ntoo txua ib lub Xab ntev li ob tshim ib nrab, dav li ib tshim ib nrab, thiab siab li ib tshim ib nrab.

11 Koj yuav muab ib co tseem kub plooj lub Xab sab hauv thiab sab nraud, thiab koj yuav xuas kub ua ib tug ntug ncig lub Xab.

26 1 Lub Tsev Nyob mas koj yuav

muab kaum pluaj ntaub los ua : koj xuas ntaub maj mos, ntaub xia tsam xem, ntaub liab paj yeeb thiab liab doog ua. Koj yuav ntos cov Tshiab Kas Lus Npis cov duab rau saum cov ntaub ntawd.

7 Koj yuav xuas plaub tshis ntos tej pluaj ntaub, ua ib lub tsev tsam phooj vov lub Tsev teev kuv, koj yuav ntos kaum ib pluaj. 15 Koj tws ib co txiag ntoo ntseej ua lub cuam khoov tsev. Koj tso cov txiag rov ntsug.

27 1 Koj yuav xuas ntoo ntseej ua lub thaj txi Ntuj. Koj yuav txua lub thaj xwm fab xwm meem, ntev tsib tshim, dav tsib tshim, hos siab li peb tshim. 2 Nyob plaub ces kaum, koj yuav ntsia plaub tug kub. koj yuav muab tooj dub plooj lub thaj. 3 Koj yuav ua ib co phiaib cug cov tshauv xyaw roj. Koj yuav txua ib co duav yawm tshauv, ib co ntim rau dej foom hmoov zoo, ib co hmuv chob nqaij, thiab ib co tais hlawv hmoov xyab. Koj yuav muab tooj nchuav ua cov twj tais ntawd tas huv tib si."

Lawv nchuav ib tug mlom nyuj.

32 : 1 - 6.

32 1 Thaum tsoom pej xeem pom tias Mais Xes tsis txawj nqes saum roob los, ces lawv tuaj ntsauv As Loos, lawv hais rau nws tias :

"Koj cia li ua ib tug tswv ntuj rau peb teev, kom nws mus ua peb ntej, vim Mais Xes uas nws coj peb tawm Hais Nkws Tos teb los, mas peb tsis paub xyov nws dua twg lawm."

2 As Loos teb rau lawv tias :

"Hle nej cov kauj ntseg kub uas nej cov poj niamb, cov tub, cov ntxhais coj ntawm pob ntseg, nej nqa tuaj rau kuv."

3 Tsoom pej xeem sawv daws hle lawv

tej kauj ntseg kub ntawm pob ntseg tib si nqa tuaj rau As Loos. 4 As Loos txais cov kub ntawm lawv tes los, nws muab nchuav hauv yeej vub ua ib tug mlom nyuj. Ces lawv hais tias :

"Cov His Xas Lais, nej ntsia ! Tus no yog nej tus Tswv Ntuj, tus uas tau coj nej tawm Hais Nkws Tos teb los !"

5 As Loos pom lawv ua li ntawd, mas nws tsa ib lub thaj txi mlom rau ntawm tus mlom hauv ntej thiab nws ceeb toom rau sawv daws tias :

"Tag kis, nej nqaum paj nqaum nruas cav txog HUAB TAIS."

6 Tag kis, lawv sawv ntxov, lawv tuaj hlawv tsiaj thiab nqa ib co txim tuaj txi lawv tus dab. Tsoom pej xeem tuaj zaum noj mov thiab haus dej, ces lawv sawv mus dhia daj dhia luag lom zem.

HUAB TAIS qhia Mais Xes tias lawv teev mlom nyuj.

32 : 7 - 10.

7 Ces HUAB TAIS hais rau Mais Xes tias :

"Koj kav tsij nqes mus sai, vim koj haiv neeg uas koj tau coj tawm ntawm Hais Nkws Tos teb los, twb ua phem lawm.

8 Lawv tos tsis taus, lawv twb maj ncaim ntawm txoj kev uas kuv nyuam qhuav qhia kom lawv taug. Lawv twb nchuav tau ib tug mlom nyuj rau lawv teev, lawv pe, thiab lawv tua tsiaj txi tus mlom.

Lawv hais tias : Cov His Xas Lais, nej ntsia, tus no yog nej tus Tswv Ntuj uas tau coj nej tawm ntawm Hais Nkws Tos teb los."

9 HUAB TAIS hais ntxiv rau Mais Xes tias :

"Kuv pom tias haiv neeg ntawd yog ib haiv neeg xwb qwb txhav dhau. 10 Zaum no, koj cia kuv npau taws rau lawv, kuv

yuav muab lawv rhuav pov tseg kom tas, kuv mam li muab koj mus tsim dua ib haiv neeg loj."

Mais Xes thov kom HUAB TAIS zam rau lawv. 32 : 11 - 14.

11 Mais Xes ua tib zoo thov nws tus HUAB TAIS Tswv Ntuj kom Huab Tais zoo siab, nws hais tias :

"HUAB TAIS, vim li cas koj thiaj li npau taws rau haiv neeg uas koj lub zog loj thiab koj txhais tes muaj hwj huam tau coj tawm ntawm Hais Nkws Tos teb los ?

12 Vim li cas koj xav kom cov Hais Nkws Tos tau kev hnyos tias : 'Yog koj siab phem koj txhob txwm coj lawv los tuag kom tas nyob pem roob kom lawv txhob tshuav ib tug nyob ntiaj teb ntxiv ?' Koj thim koj lub siab npau taws ceev thiab tso qhov phem uas koj xav ua rau koj haiv neeg pov tseg mas. 13 Thov koj nco ntsoov txog koj cov tub txib Has Nplas Has, His Xas Has thiab His Xas Lais, uas koj tau cog lus ruaj rau lawv tias : 'Kuv yuav ua kom nej cov xeeb ntxwv huam vam coob npaum li cov hnub qub, thiab kuv yuav muab lub teb chaws uas kuv tau hais rau nej, pub rau nej cov xeeb ntxwv, ua lawv tug mus ib txhis.'"

14 Ces HUAB TAIS thim xav, nws tsis ua phem rau nws haiv neeg raws li nws tau hais.

Mais Xes tsoo ob daim txiag zeb sau txoj cai. 32 : 15 - 24.

15 Mais Xes nqes saum roob rov los, nws nqa ob daig txiag zeb Tim Khawv ntawm tes, ob daig txiag zeb ntawd sau ob sab huv si, sab saud thiab sab hauv. 16 Ob daig txiag ntawd yog Tswv Ntuj txaug,

cov npe ntawv los yog Tswv Ntuj sau, nws muab txaug rau saum ob daig txiag zeb. 17 Yos Xuas hnov tsoom pej xeem qw tsheej tsaug, nws hais rau Mais Xes tias :

"Muaj suab nrov cuag li sib tua hauv lub yeej !"

18 Mais Xes teb tias :

"Tsis yog lub suab qw yeej ib nthwv rog, kuj tsis yog lub suab quaj swb ib nthwv rog thiab. Kuv hnov zoo li yog suab hu nkauj sib teb."

19 Thaum nkawd los txog ze lub yeej lawm, Mais Xes pom tus mlom nyuj thiab tej pab hu nkauj dhia daj dhia luag lom zem. Ces Mais Xes npau taws heev, nws muab ob daig txiag zeb ntawm nws tes pov tseg, ob daig txiag zeb tawg tas ntawm taw roob. 20 Nws muab tus mlom nyuj uas lawv nchuav, pov hlawv hauv hluav taws, nws muab coj los tuav ua hmoov mos mos, nws muab coj mus nphoo rau hauv dej, ces nws yuam cov His Xas Lais haus cov dej ntawd.

21 Mais Xes hais rau As Loos tias :

"Haiv neeg ntawd ua dab tsi rau koj, vim li cas koj thiaj cia lawv ua ib qho txhaum loj tas npaud ?"

22 As Loos teb tias :

"Thov koj tus ua Hlob, tsis txhob npau taws, koj paub tias haiv neeg ntawd yeej nkhaus.

23 Lawv hais rau kuv tias : 'Koj ua ib tug tswv ntuj rau peb teev, kom nws mus ua peb ntej, vim tus Mais Xes uas nws coj peb tawm ntawm Hais Nkws Tos teb los, mas peb tsis paub xyov nws dua twg lawm.'

24 Kuv hais rau lawv tias : 'Leej twg muaj kub, kom nqa tuaj.' Lawv muab tuaj rau kuv. Kuv coj mus pov rau hauv hluav taws, ces tus nyuj uas koj pom no thiaj tawm los."

Mais Xes rov thov kom Ntuj zam rau cov His Xas Lais. 32 : 30 - 35.

30 Tag kis tom qab, Mais Xes hais rau tsoom pej xeem tias :

"Nej tau ua ib qho txhaum loj kawg. Kuv yuav nce mus pem roob mus cuag HUAB TAIS, kuv yuav thov HUAB TAIS, tej zaum nws yuav zam rau nej."

31 Mais Xes thiaj rov nce mus cuag HUAB TAIS, nws hais tias :

"Haiv neeg ntawd ua ib qho txhaum loj kawg. Lawv puab ib tug tswv ntuj kub rau lawv teev. 32 Tab sis thov koj, thov koj ua siab zam rau lawv qhov txhaum. Yog koj tsis kam zam, no thov koj rhuav kuv lub npe tawm hauv phau ntawv uas koj tau sau !"

33 HUAB TAIS hais rau Mais Xes tias :

"Tus tau ua txhaum rau kuv, mas kuv yuav rhuav nws lub npe tawm hauv kuv phau ntawv mus. 34 Zaum no koj rov mus, koj coj haiv neeg ntawd mus rau qhov chaw uas kuv tau hais rau koj. Kuv tus Tshiab yuav mus ua koj ntej. Hnub kuv yuav tuaj xyuas lawv, kuv mam li muab txim rau lawv raws li lawv qhov txhaum."

35 Ces HUAB TAIS muab txim rau tsoom pej xeem, vim lawv tau nchuav tus mlom nyuj, yog tus mlom uas As Loos nchuav rau lawv.

**Lub Tsev Tsam Phooj Sib Ntsib.
33 : 7 - 11.**

33 7 Mais Xes nqa lub Tsev Tsam Phooj, nws coj mus tsa rau sab yeej nraud, nrug deb ntawm lub yeej. Nws tis npe rau tias Tsev Tsam Phooj Sib Ntsib. Yog leej twg xav nug dab tsi ntawm HUAB TAIS, mas nws yuav tawm mus tom lub Tsev Tsam Phooj Sib Ntsib,

nyob sab yeej nraud. 8 Niaj zaus thaum Mais Xes tawm mus nraum lub Tsev Tsam Phooj, mas tas sawv daws sawv, nyias sawv ntsug ntawm nyias lub qhov rooj tsev ntaub ntsia, lawv ntsia Mais Xes mus txog ntua ntawm lub Tsev Tsam Phooj. 9 Niaj zaus, thaum Mais Xes mus hauv lub Tsev Tsam Phooj, mas twv huab nqes los nyob ntawm qhov rooj, HUAB TAIS hais lus rau Mais Xes. 10 Tas sawv daws pom twv huab nyob ntawm lub qhov rooj Tsev Tsam Phooj, ces sawv daws sawv, thiab nyias txhos caug ntawm nyias lub qhov rooj tsev ntaub hawm. 11 HUAB TAIS hais lus rau Mais Xes, tim ntsej tim muag sib ntsia, ib yam li ib tug tib neeg nrog nws tus phooj ywg tham tas, ces Mais Xes mam rov los hauv lub yeej. Tab sis Mais Xes tus tub txib Yos Xuas uas yog Nuv tus tub, nyob rawv hauv lub Tsev Tsam Phooj tsis nrug li.

Mais Xes tsis pom HUAB TAIS lub ntsej muag. 33 : 18 - 23.

18 Mais Xes hais rau Huab Tais tias : "Thov koj pub kuv pom koj lub hwj chim."

19 HUAB TAIS hais tias :

"Kuv yuav ua kom kuv lub hwj chim ci ntsa iab hla ntawm koj xub ntiag, thiab kuv yuav hais lub npe HUAB TAIS rau koj mloog. Vim kuv hlub tus uas kuv hlub thiab kuv khuv leej tus uas kuv khuv leej."

20 HUAB TAIS tseem hais tias :

"Tab sis koj yuav tsis pom kuv lub ntsej muag, vim tias leej tib neeg pom tsis tau kuv lub ntsej muag yog nws tseem muaj txoj sia."

21 HUAB TAIS hais ntxiv tias : "Ntawm no muaj ib qho chaw ze kuv, koj

sawv saum lub pob zeb. 22 Thaum kuv lub hwj chim hla los, kuv yuav muab koj tso rau hauv kis pob zeb thiab kuv yuav muab tes los thaiv koj kom kuv mus dhau tso. 23 Ces kuv yuav tshem kuv txhais tes kom koj pom kuv lub nrob qaum, tab sis kuv lub ntsej muag, mas neeg pom tsis tau."

HUAB TAIS yees tawm los rau Mais Xes pom. 34 : 5 - 9.

34 5 HUAB TAIS nyob hauv ib twv huab nqes los, HUAB TAIS los nrog Mais Xes sawv ua ke. Mais Xes hu txog HUAB TAIS lub npe. 6 HUAB TAIS hla ntawm Mais Xes xub ntiag, ces Mais Xes qw nrov nrov tias:

"HUAB TAIS, HUAB TAIS, tus Tswv Ntuj uas lub siab hlub mos nyoos, thiab khuv leej neeg, tus npau taws qeeb, tus pub paj tshab ntau, tus tsis fav xeeb. 7 Koj pub txiaj ntsim rau txhiab vam leej, koj ua siab ntev nyiaj ntsia neeg qhov phem, qhov yuam kev thiab qhov txhaum, tiam sis koj tsis cia leej twg dim txim. Thaum phaj txiv ua txhaum, koj nplua phaj tub thiab phaj xeeb ntxwv mus txog tiam peb tiam plaub huv si."

8 Thooj txhij ntawd, Mais Xes txhos caug ntua pe hauv av pe. 9 Ces nws hais tias :

"Huab Tais, yog koj saib kuv tsim nyog, thov koj nrog nraim peb mus, txawm tias peb yog ib haiv neeg xwb qwb txhav, los thov koj zam peb qhov yuam kev thiab zam txhaum rau peb, koj muab peb los ua koj tug."

Mais Xes nqes saum roob los.

34 : 29 - 35.

29 Thaum Mais Xes nqes saum roob Xis

Nais rov los, nws tuav ob daig txiag zeb Ua Tim Khawv hauv nws tes. Nws tsis paub hais tias nws lub ntsej muag ci ntsa iab vim nws tau nrog HUAB TAIS tham. 30 As Loos thiab tas tsoom His Xas Lais pom Mais Xes, lawv pom nws lub ntsej muag ci ntsa iab, lawv ntshai txav los ze nws. 31 Mais Xes hu lawv, ces As Loos thiab tas cov txwj laus thiaj txav los ze nws. Mais Xes nrog lawv tham. 32 Cov pej xeem His Xas Lais mam txav los tom qab, ces Mais Xes qhia tas puas tsav yam uas HUAB TAIS tau hais nyob saum roob Xis Nais. 33 Thaum Mais Xes hais lus tas lawm, nws muab ib daig ntaub los npog nws ntsej muag. 34 Thaum Mais Xes yuav nkag mus nrog HUAB TAIS tham, nws mam tshem daim ntaub npog nws lub ntsej muag mus txog thaum nws yuav tawm los. Nws tawm los, nws tshaj rau cov His Xas Lais paub txog HUAB TAIS cov lus ceeb toom. 35 Cov His Xas Lais pom Mais Xes lub ntsej muag ci ntsa iab, ces Mais Xes rov muab ntaub los npog nws ntsej muag mus txog thaum nws yuav chaws rov mus nrog HUAB TAIS tham dua.

Mais Xes ua lub tsev raws li HUAB TAIS qhia. 40 : 16 - 21.

40 16 Mais Xes ua tas ib puas tsav yam ntawd raws nraim li HUAB TAIS kom ua. 17 Xyoo ob, lub ib hlis xiab ib, lawv tsa lub Tsev. 18 Mais Xes tsa lub Tsev, nws ntsia cov taw ntsa, nws tsa lub cuam khoov, nws ntsia cov nqaj thiab tsa cov ncej. 19 Ces nws tsa ib lub tsev tsam phooj vov lub Tsev. Mais Xes muab daim ntaub tsev tsam phooj

vov sab saud raws li HUAB TAIS tau hais rau Mais Xes. 20 Mais Xes muab ob daig txiag zeb Ua Tim Khawv kaw rau hauv lub Xab. Nws muab cov nqaj tso saum lub Xab, thiab muab lub rooj zaum txawb rau saum lub Xab.

21 Nws nqa lub Xab mus tso rau hauv lub Tsev. Ces nws muab ib daim ntaub thaiv, nws muab ntaub thaiv lub Xab Cog Lus raws li HUAB TAIS tau hais rau Mais Xes.

HUAB TAIS nqes los nyob hauv lub Tsev. 40 : 34 - 35.

34 Twv huab los ntsauv lub Tsev Tsam Phooj Sib Ntsib, ces HUAB TAIS lub hwj chim ci puv nkaus lub Tsev. 35 Mais Xes nkag tsis tau mus rau hauv lub Tsev Tsam Phooj Sib Ntsib, vim twv huab tseem ntsauv tsis txav chaw thiab HUAB TAIS lub hwj chim ci ntsa iab puv lub Tsev.

Twv huab coj cov His Xas Lais kev. 40 : 36 - 38.

36 Thaum tsoom tub ki His Xas Lais mus txog ntu kev twg, yog twv huab nce mus nyob siab saum lub Tsev lawm, mas lawv sawv kev mus ntxiv. 37 Yog twv huab tsis nce siab, mas lawv so nyob ntawd txog hnub uas twv huab nce siab rau saud. 38 Vim nruab hnub mas HUAB TAIS twv huab nyob saum lub Tsev, hos hmo ntuj mas muaj ib tug ncej hluav taws cig cig hauv twv huab rau tas tsoom His Xas Lais pom kev. Lawv mus txog twg mas HUAB TAIS nrog nraim lawv zoo li ntawd.